

الجمهورية العربية السورية
وزارة التعليم والبحث العلمي

أولادنا في لندن


** سرهر الليل **

www.liilas.com/vb3



عائى حاطم

www.liilas.com/vb3



المؤلف . . . والكتاب

■ علي سالم ■

- علي سالم قادر دائما على تفجير الضحكات من أكثر المواقف ايلاما وهذا هو ما يميز الكوميديا المصرية الأصيلة ، انها أحزان عميقة ، تعلن عن نفسها من خلال الضحكات .
- والمتتبع لمسرحنا المعاصر ، لا يستطيع مهما كان موقفه السياسي والنقدي ان يتجاهل مسرحيات مثل ((انت اللي قتلت الوحش)) ، ((عفاريت مصر الجديدة)) ، و ((أغنية على المر)) ، تلك المسرحيات التي أحدثت هزة عنيفة في المسرح المصري على المستوى الفني والسياسي . كما اننا على مستوى الفرجة الصريحة ، لا نستطيع ان نتجاهل مسرحية ((مدرسة المشاعيين)) التي استمر عرضها ثلاثة أعوام كاملة .
- وفي مسرحيته هذه ((أولادنا . . . في لندن)) يتالق علي سالم ويصل الى قمة نضجه الفني ، فهو يتناول مشكلة جادة ومعاصرة ، مثل ضياع شبابنا في أوروبا ويعالجها بصنوبة ورقة في اطار من الضحكات العالية الذي يقترب بنا أكثر وأكثر من صلب المشكلة ، ثم لا ينسى ان يذيب هذا كله في مهارة شديدة لكي يتحول الى دموع حزينة في النهاية .



ثقافة وعلوم إنسانية لكل الشعب

تدبير عن مؤسسة دار

الشعب

للصحافة والطباعة والنشر والتوزيع ..

رئيس مجلس الإدارة ورئيس التحرير

أحمد بن إبراهيم مرزوق

مدير عام التحرير

النور من علون

الإدارة : مؤسسة دار الشعب

٩٢ شارع قصر العيني ، القاهرة ، ج.م.ع.

٢٦١١٠

تليفون

متنظّل القاهرة دائماً قلب العروبة والإسلام النابض
تتبعها أماكنها التاريخية والحصنارية
في عالم... الفكر.. والثقافة... والنشر.....

● الطبعة الأولى ● يوليه ١٩٧٥ ●

■ ■ الأعداد الفني : ثروت الشعراوي

■ ■ الفلاف والرسوم

■ ■ الداخلية للفنان : محمد حاكم

■ ■ الناشر : مؤسسة دار الشعب

٩٢ شارع قصر العيني

القاهرة تليفون ٢١٨١٠

اولادنا في لندن

تراخيما بلدي

** سهر الليل **

www.liilas.com/vb3

على سلام

**** سهر الليل ****

www.liilas.com/vb3

الفصل الأول

(شقة متواضعة في شارع إيرلز كورت)

Earl's Courte الشقة مكونة من غرفتين وممر صغير بينهما ، غرفة النوم ضيقة وبها سريران صغيران ودولاب في الحائط ، غرفة الصالون واسعة نوعا ما ، بها مقعدان فقط ومائدة صغيرة ودولاب مركب في الحائط ، نافذتان عريضتان على الشارع في غرفة الصالون .

على الممر يقع حمام صغير وامامه مطبخ، يراعى ان يكون المشهد على المسرح قطاعا طوليا في الشقة ، باب الشقة في صدر المسرح والى اليمين المتفرج ، عندما تفتح السقار تكون الشقة مظلمة ، لا يضيئها الا اثنوار لافئات النيون المتقطعة التى تاتى من الشارع عبر النوافذ . . الحوار التالى يصلنا من خلال المايكروفون لشخصين يصعدان السلم)

... : سيب الشنطة الكبيرة .

... : لا . . حاشيلها انا .

... : هو البيت ده مفيش فيه اسانسير . . ؟

... : اسانسير على ايه . . ؟ البيت كله دورين . . وشقتنا في

الدور الأول .

... : الظاهر مفيش حد الا احنا .

... : واضح ان الشقق التانية مكاتب . . بيقفلوا بالليل . .

خد بالك الأسطوانات حاتقع .

... : خلاص وصلنا ، المفتاح معاك ؟

... : ايوه ..

... : قول بسم الله الرحمن الرحيم وانت بتفتح .. وادخل

برجلك اليمين .. ايوه .. برجلك اليمين .

... : بسم الله الرحمن الرحيم

(يفتح باب الشقة ويدخل سعيد ، يمد يده

ويصطف على مفتاح النور المجاور للباب ،

يضيء المكان فتتضح ملامح الشقة تماما ،

يحمل حقيبة كبيرة وعدة أشياء ، وبعد عدة

ثوان يدخل زميله عصمت بعصمة حقايب

هانديج من احجام مختلفة ومجموعة كتب

واسطوانات ، سعيد يتأمل المكان باعجاب

شديد ، عصمت ياخذ طريقه لغرفة الصالون

يفتح احدى الحقايب يخرج منها كتبا يرصها

على المائدة الصغيرة)

سعيد : (يتأمل السرير بفرحة) سرير .. لوحدي .. باعيني .

(يلقى بجسمه على السرير بتمتع)

سعيد : اخيرا بتتحقق احلامي .. حنام على سرير لوحدي .

عصمت : هي دي احلامك ؟

سعيد : دي قمة احلامي .

عصمت : ده انت متواضع قوى .

سعيد : لو كنت نمت طول عمرك على سرير واحد انت واخواتك

الخمسة .. كنت فهمتنى .

(ينهض من على السرير ويذهب الى المطبخ)

سعيد : بوتاجاز .. تلاجيه .. يا هيني .. يا سيدى .. ده ايه

الهنا ده ؟

(يلقى نظرة على الحمام)

بانيو .. مياه سخنة ومياه باردة .. ودش متحرك ..
يا سلام .. الواحد ينام طول الليل على السرير لوحده
.. والصبح يقوم ياخذ حمام سخن .. وبعدين يفطر ..
يا سلام .. يفطر ..

قصمت : معجزة دي كمان ؟ .. فكرتني ، عاوز انزل اشترى كام
علبة فول .

سعيد : مفيش فول حايدخل الشقة دي طول ما انا عايش ..
علبة الفول اللي حاتدخل هنا ، حاتدخل على جثتي .

قصمت : ده موقف سياسي ده ؟

سعيد : لا .. موقف انساني .. سنين واجيال وانا افطر الصبح
فول عادى .. والضهر فول بتقلبه .. والمغرب فول
بقوطه .. في شقتنا دي الفطار حايبقى فطار .. توست
مدهون بالزبدة .. قهوه باللبن .. قطعة من اللحم
البارد .. حنة جبنة فلمنك .. حنة مربة .. بيض
مقلي ..

(يرتبان حاجياتهما)

قصمت : انت انسان غريب جدا .. بتقول الكلام ده في لندن ؟
لندن ؟ ؟ .. انجلترا .. ؟ .. اعظم قلعة من قلاع
الديمقراطية في العالم .. بقى بدال ما تفترف من
الحضارة والثقافة .. بدال ما ترمى نفسك في أعماق
الفكر الانجليزي ..

سعيد : (مقاطعا) .. بأقول لك ايه .. ؟ .. اطلع من مخي ..
انا حاغترف لحمه .. حاغترف فراخ .. حاغترف بنات
ورقص وفسح .. انت تفترف ثقافة وحضارة زي
ما انت عاوز .. بس بعيد عني ..

عصمت : لكم دينكم ولي دين .

سعيد : اسمع يا عصمت .. احنا مش عاوزين نختلف .. المرة
دى لو اختلفنا .. حاسيبك .. لازم نتفق ، اللي اوله
شرط ، آخره نور .. الشقة دى ، بتاعتنا .

عصمت : طبعا .

سعيد : ما حدش حايدخلها غيرنا .. اودة النوم دى بتاعتنا احنا
الاتنين بس .. المطبخ ده بتاعنا احنا الاتنين .. الحمام
ده ما حدش حايستعمله الا احنا الاتنين .. اودة الصالون
دى .. احنا بس اللي حاتممع بيها .

عصمت : سعيد انت غريب قوى ، شايفنى مليتها ضيوف يعنى ؟
.. خلاص .. احنا انطردنا من ست لو كاندات بسبب
الضيوف .

سعيد : كويس انك قلتها بنفسك .. المرة دى مش عاوز انطرد
من هنا .. عاوزين نستقر فى مكان بقى .. اوعى تقول
لحد على عنواننا .. انشا الله يكون سفير مصر .

عصمت : حاضر .

سعيد : ولا تبعت جوابات لمصر تقول فيه عنواننا .

عصمت : لا .. دى ما قدرش .

سعيد : عاوز تبعت مين ؟

عصمت : مش لسه حا بعت ؟ انا بعت لأمى فعلا .. بعت لها
جواب من عشرين يوم .

سعيد : اسمع يا عصمت .. والله العظيم لما اشوف ابويا فى
الشارع .. امى .. مفيش قوة فى الوجود ، حا تخلىنى
انيم حد جانبي على سريرى .

(جرس التليفون . سعيد يتناول السماعة)

Hallo, this is Saied Speaking, Yes, yes Madam : سعيد
O,K, Madam, OK

بعيد : (يتلفت لعصمت) .. دى الوليه صاحبة البيت

عصمت : ما تقولش OK يابنى ، قول O'right

سعيد : مش فاهم حاجة من كلامها .. (يعطيه السماعه) .

عصمت : Yes my Lady, this is Esmat, be sure my Lady, every tming will be o'right, yes my lady, we are civilized enough to understand things Like this, O'right, thank you very much indeed.

(يضع السماعه)

عصمت : مفيش حنفية تفتح بعد الساعة عشرة بالليل .. الشقة
ما ينامش فيها الا اتنين بس .. الضيوف ممنوع ..
واذا كان فيه صديقات .. ما يقعدوش لبعده تسعة
بالليل .. كمان ما حدش يقنى بصوت على ..

سعيد : ادى انت شفت بنفسك آهو .. ودى ست مش سهله
واضح ان ليها قراب في الحكومة الانجليزية .. قبل
كده كنا بنطرد من اللوكاندات .. المره دى ممكن نطرد
من لندن نفسها ..

عصمت : عاوز حاجة من تحت .. ؟ .. انا حانزل اجيب عشا ..

سعيد : هات لنا شوية بقالة ، وهات لنا شوية معلبات ..
ومفيش داعى تعمل حلق وتسرب لى علبه فول فى
وسطهم .

عصمت : هي ديكتاتوريه يعنى ؟ .. افرض نفسى فى الفول ..

سعيد : تاكله بعيد عن هنا .. مش عاوز اتواجد أنا والفول فى
مكان واحد ..

عصمت : دى عقده بقى .

سعيد : أبوه عقده .. ومش ناوى اتعالج منها .. وهات لنا
زبادى بالفواكه .. وجبنة وشاى . وسكر . وكام حنة
لحمه . وكام علبة بيرة .. وخرطوشة سجائر ..

(عصمت يخرج ، سعيد يرتب سريره برفقة
.. يستنشق باستمتاع هواء الشقة)

سعيد : وحدى .. وحدى .. والعالم بين ذراعى .. كل شيء
بأوان .. وكل شيء قسمه ونصيب .. مكتوب لى انام
على سرير لوحدى على بعد خمسة آلاف كيلو من السيدة
زيب .. اما اسجل اللحظة التاريخية دى .

(يترك السرير ويتجه الى المائدة الصغيرة
يتناول نوته وقلما ويكتب بصوت عال)

سعيد : لندن فى ٥ يوليو ١٩٧٢ .. اجرت انا وعصمت شقة
جديدة بعشرين جنيها فى الأسبوع .. ودفعا شهر
مقدما .. اجرها غالى .. ولكنها مريحة وجميلة .. لن
نسمح لأحد بزيارتنا فيها .. انها المرة الأولى فى حياتى
التي انام فيها على سرير بمفردى .. (يتوقف لحظة)
الحملة دى عاوزة شوية دقة .. انها المرة الأولى فى
حياتى التي (يضغط على حروف الكلمة) .. س و ف
.. انام فيها على سرير بمفردى .. ولن أسمح مطلقا ..

(جرس الباب ، يترك القلم وينظر بدهشة
لباب الشقة ، يخطو ناحية الباب فى توجس
يفتح الباب ، يظهر فى فتحة الباب شاب
يحمل حقيبة صغيرة ، ذقنه لم تحلق منذ
أيام ، بدلته مهشمة كما لو كان ينام بها منذ
فترة طويلة .. سعيد يحلق فيه لحظة فى
بارده)

May I help you Sir ? : سعيد

Does he, .. Isthis .. Isit? : الشاب

(يياس من استطاعته الكلام بالانجليزية)

الشاب : حضرتك مصرى ؟

No. : سعيد

الشاب : حضرتك بتعرف عربى ؟

Little. : سعيد

الشاب : دى شقة الأستاذ عصمت ؟

Yes. : سعيد

الشاب : هو موجود دلوقت ؟

No. : سعيد

الشاب : أمال فىن ؟

سعيد : سافر .. راح برمنجهام ..

الشاب : حايفيب كثير ؟

سعيد : حوالى اسبوع .

الشاب : استناه بقى وامرى لله .. اصلى جايب له معايا حاجه

مهمة .. وخايف تضيع منى .

(يقول جملته وهو يدخل الشقة بهدوء ،

سعيد لا يجد لديه الجراة لئنه .. الشاب

يدخل مباشرة لغرفة النوم .. ينتظر للسريـر

مبتسما بارتياح .. قبل ان يجلس على

السريـر ، يصرخ فيه سعيد بوحشية)

سعيد : ابعده عن السرير .

(الشاب ينظر له فزعا ، سعيد يتصنع
الرقعة)

سعيد : اتفضل في الصالون يا عزيزي .. عندنا أودة صالون .

(الشاب يجر قدميه لغرفة الصالون .

ويجلس متهالكا على المقعد ويمد ساقيه أمامه

في استرخاء وبعد أن وضع الحقيبة بجواره)

الشاب : اسمى عبده العطارى ...

(سعيد ينظر له مليا ولا يجيب)

الشاب : اهلا وسهلا

سعيد : اهلا وسهلا ..

عبده : واضح أن حضرتك مصرى .

سعيد : أيوه ..

عبده : أمال أنكرت ليه في الأول ؟

سعيد : هو أى حد أقول له أنا مصرى .. طب افرض واحد

صهيونى .. انت ناسى اننا في بلد اجنبى .. وفي حالة

حرب كمان .. وصلت من مصر أمتى ؟

عبده : من أربعة أيام .

سعيد : ونازل فين ؟

عبده : في الشوارع .

سعيد : بتنام في الشوارع ؟

عبده : ما بنامش .. ما نمش .. (يتشاب بشدة) ما نمش

من ساعة ما نزلت من الطيره ؟

سعيد : اسمع .. احنا هنا في لندن بقى لنا سنتين .. وشغنا
المر قبل ما نستقر .. الحياة هنا مش زي مصر .. هنا
مفيش دلح .. هنا حرب .. هنا مفيش صاحب ولا
صديق .. أبوك نفسه ماينفعكش .. لازم تعتمد على
نفسك .. تنام في محطة المترو ، تنام على الرصيف ..
طول النهار ، وطول الليل تدور على شغل .. ولما تلاقى
شغل ، تأجر أودة ، وتبتدى تستقر .

عبده : (يتكلم بصعوبة من شدة الاجهاد) .. حاضر هو ..
هو ده .. اللى حاعمله

سعيد : مفيش حد هنا يساعد حد .. ولو رححت لاي صديق
.. ما تقعدش أكثر من دقيقتين ، وتقوم تناضل .. انا
لو منك .. أغل وشى بسرعة .. وانزل اناضل .

(تميل رأس عبده على صدره ، ويرتفع
شخيره لقد نام تماما على كرسیه)

سعيد : اصحى .. عبده .. عبده .. (يلكزه في كتفه) ..
اصحى يا عبده .

(يفتح عبده عينيه بصعوبة)

عبده : هه .. هه ..

سعيد : اصحى .

عبده : انا صاحى .. بس الظاهر سرحت شويه .

سعيد : انت هنا مش في مصر .. لما يكون حد بيكلمك ، لازم
تتحترم كلامه ، وتسمعه كويس .. ما تنامش .

عبده : لامواخذه .. اصلى تعبان قوى .. بس انا سامعك
كويس .

سعيد : طيب كنت باقول ايه ؟

عبده : كنت يتقول ، تصحى الصبح تغسل وشك بسرعة .
سعيد : انا ماقلتش الصبح يا عبده .. انا قلت تغسل وشك
بسرعة .. وتنزل تناضل دلوقت ..

عبده : (يقاوم النوم بشدة) ... جت في ودنى الصبح .

سعيد : اوعى تتصور انى عاوز اتخلص منك .

عبده : اعوذ بالله .

سعيد : انا يا قول لك كده عشان مصلحتك .. اسمع يا عبده ..
فوق كده واسمعنى ...

عبده : اتفضل .

(يبذل مجهودا عنيفا لكى يظل فى حالة نقظة)

سعيد : بصفتى قديم فى لندن ، عاوز اوعيك .. الضعيف هنا
يموت .. وماحدثش يستحمل حد .. وعصمت اللى
انت جايله ده شخص شرير جدا .. ابن خالته جه من
مصر وحب ينام عنده ليلة واحدة .. وماه من الشباك ،
فانت تسيب الحاجة اللى انت جايبها له وتغسل وشك
وتنزل دلوقتى .. تناضل .. انت جايب له معاك ايه؟

(عبده يخرج من جيبه خطابا يعطيه له)

سعيد : خلاص .. انا حاسلمه له .. انا عاوزك بقى ما تضعفتش
.. انزل وواجه العالم (يشجعه بحماس) .. واقتحمه
... انا عاوزك تورى للانجليز ، ان الشاب المصرى
بعشرين شاب انجليزى .. (يزداد حماسه) .. يا الله
يا يطل .

(يرتفع شخيره ، لقد نام بالرغم من عينيه

الفتوحتين)

سعید : یانہار اسود . . نایم وعینہ مفتوحة . . دہ مش تعیان
... دہ میت . . عبده . . عبده . . طب قوم نام . .
قوم نام هنا . .

(يساعده على النهوض بصعوبة ويقتاده لركن
الغرفة ، يتمدد عبده على الأرض كالقتيل) .

سعید : ودينى ماناقاعد لك يا عصمت . . عشان تبقى تبعه
العنوان لكل من هب ودب .

(يجلس على المقعد وهو يحرق في جسم
عبده الممدد على الأرض ، يدخل عصمت وهو
يحمل عدة اكياس . يدخل بها مباشرة على
المطبخ) .

عصمت : الراجل البقال اللى على الناصية طلع باكستانى . . عنده
طرشى وجبنة بيضة . وزيتون اسود . .

(يقترب بهدوء من سعید ، يكتشف وجود
عبده الفطائرى . . سعید يمد له يده صامتا
بالخطاب يفتحه بسرعة ويقرا) .

سعید : اول الفيث قطرة .

(ينظر له طويلا بغيظ)

عصمت : بتبص لى كده ليه ؟ أنا اللى دخلته الشقه ؟

سعید : عرف العنوان منين ؟

عصمت : من امى .

سعید : ايه ده ؟ مين ده ؟

عصمت : (يلقي نظرة سريعة على الخطاب) . . اسمه عبده
الفطائرى .

سعید : عارف ان اسمه عبده الفطائرى . . بس مين هو . .
قريبك ؟

عصمت : ده ابن الفطايري افندى رئيس قسم الملفات فى وزارة الصناعة .. الفطايري افندى متجوز بنت خال الأستاذ عبد الحليم الدخيدى .. عبد الحليم الدخيدى متجوز بنت عمى .

(سعيد ينهض ليعد حقيته مرة اخرى) .

سعيد : عصمت انا آسف جدا .. الظاهر مش حائزف نواصل

مع بعض .. انا حادور لى على اودة أعيش فيها لوحدى .

عصمت : ما تعقيدش الموقف .. انا عن نفسى ما اعرفوش ..

وما يهنئش فى حاجة .. تحب أشيله وأرميه فى الشارع

.. مستعد أعملها .. كان المفروض تفهمه أننا

ما بنستقبلش ضيوف فى شقتنا ..

سعيد : خلاص .. صحيه وقل له الكلام ده .

عصمت : مفيش داعى للقوة الشديدة دى .. الصبح انشاء الله

يصحى ، يفطر ويشرب الشاي ، ونقول له الكلام ده ..

ما تعكنش نفسك .. روق .. اعتبره مش موجود ..

رواق بقى يا حصان .. مفيش داعى تعكن نفسك بحاجة

صغيرة زى دى .. احنا عاوزين نحتفل بالشقة ..

حانعمل عشا فاخر .. ونفرقع كام علة بيرة .. ونسمع

مزيكة .

سعيد : يعنى دى اول وآخر ليلة بنام فيها هنا ..؟

عصمت : طبعاً ..

سعيد : لما أشوف الصبح .. خلاص .. اجهاز بالعشا .. وانا

حادخل آخذ حمام سخن .

(عصمت يدخل المطبخ بينما يختفى سعيد

داخل الحمام ، جرس الباب .. عصمت

يخرج من المطبخ ليفتح .. شاب فى حوالى

السابعة عشر ومعه حقيبة) .

الشاب : الأستاذ عصمت ؟

عصمت : أبوه .

الشاب : أنا جاي لك من طرف الأستاذ يوسف حنفي .

عصمت : اهلا وسهلا . اتفضل .

(الشاب يدخل الشقة مبتسما في سعادة) .

الشاب : أنا سمير . . سمير عبد العزيز . . الأستاذ يوسف حنفي
يبقى خالي .

عصمت : اهلا وسهلا . . تاخذ كباية بيرة ؟

الشاب : لا معلش . . أنا عمري ما شربتها في حياتي . . اكون شاكر
قوى لو عملت لي شاي .

عصمت : شاي ؟

سمير : (بحرج) بعد اذنك أقوم أقوم أعمله بنفسي .

عصمت : الشاي هنا ما يتعملش . . شوية ماية سخنة من الحنفية
وينحط فيها كيس شاي .

(عصمت يدخل المطبخ ، الشخص النائم

يسترعى انتباه سمير) .

سمير : زميلك نايم على الأرض ليه ؟

عصمت : أصله متعقد من السراير .

(الحوار التالي يدور بينهما بينما سمير يفتح

حقيبته ببساطة ويخلع ملابسه ويبدأ في ارتداء

بيجامته بطريقة عفوية تماما وكأنه في غرفته

الخاصة) .

عصمت : ويوسف اخباره ايه . . ؟ . . خلص لي الاجازة ؟

سمير : اجازتك الاولانية خلصت . . وحضرتك بعث تمدها سنة
كمان .

عصمت : أيوه سنة بدون مرتب ؟

سمير : مدير شئون العاملين لسه مزرجن فيها .

عصمت : بالرغم من البلوفر أبو عشرين استرلينى .. حار ونار فى جتته .

سمير : بس الأستاذ يوسف مطمئن انها حاتمشى .. وبيقول لك اطمئن ..

(عصمت ياتى من المطبخ ومعه كوب الشاي)

فيلاحظ انه أخذ فى ارتداء بيجامته) .

عصمت : انت هنا بقالك قد ايه ؟

سمير : أنا وصلت من ساعة تقريبا .

عصمت : يعنى ماشتغلتش ، ولا اجرلش اودة ولا اى حاجة .

سمير : لا .. بس معايا عقد عمل .

(يمد يده بورقة ، ياخذها عصمت) .

عصمت : (تتنابه الدهشة للحظات ثم يتكلم بهدوء) .. العنوان

ده بعيد قوى عن هنا .. ده فى هولندا ..

سمير : يانهار اسود .. هولندا .. ؟ ..

عصمت : انت ماتعرفش انه فى هولندا .. عاوز تفهمنى ايه ..

قلت للكمارى هولندا فقط لك لندن .؟

سمير : آه فهمت .. الواد اللي كان راكب معايا .. العقود بتاعتنا

الخطط طب وأنا ح اعمل ايه دلوقت ؟

عصمت : ولا حاجة .. الصبح نتصرف .. انت طالب فين ؟

سمير : تجارة الازهر .. فى سنة اولى .. (يكاد يبكى) وأنا

حاصل ايه دلوقت يا أستاذ عصمت .؟ أنزل أروح

هولندا أدور عليه .. ؟

عصمت : الدنيا ليل باسمر .. وهولندا زمانها قفلت .. حاتنزل
تلطش في اوروبا في الضلعة .. ؟ .. النهار له عينين ؟

سهر : والعقد يا استاذ عصمت ؟

عصمت : العقد مالوش اهمية . وبلاش استاذ عصمت دي ؟

سهر : امال حاشتفل ازاي ؟

عصمت : الشغل هنا بالذراع . مش بالعقود .. انت الليلة دي
تتعشى وتنام .. والصبح ربنا يفرجها .. انا حاشوف
لك شغل .. واشوف لك اودة في لوكاندة .

سهر : انا اتعشيت في الطيارة .. مافيش داعي تتعب نفسك .
يا .. (يتردد قليلا) يا ابيه عصمت .. انا ممكن اسكن
معك هنا وادفع نصيبي في الايجار .. وما دام زميلك
متمعد من السراير .. آخذ انا السرير الثاني (في طريقه
لسرير سعيد) ماتخافش .. انا مش مزعج .

عصمت : (يقتصب ابتسامة وهو مزعج) .. ده مش سرير اللي
نايم على الارض .. ده سرير زميلي اللي بياخد حمام ..
وبيتعقد قوى من اى واحد ينام على سريره .
(سهر يتعد عن سرير سعيد ثم ينظر الى
عبد النائم) .

سهر : امال الاستاذ ده مش زميلك ؟

عصمت : لا .. ده واحد ماعرفوش .. ضيف ..

سهر : انجليزى ؟

عصمت : لا .. مصرى ..

سهر : خلاص .. انا جانبه للصبح .

(يعطى لعصمت خطابا ، عصمت يفض الخطاب ،

ثم يخرج بطانية خفيفة من الدولاب يعطيها

لسهر) .

عصمت: الجو كويس .. البطانية دي كفاية .

(سهر يرقد بجوار عبده ويتغطي بالبطانية) .

سهر: لو ماما شافتني وانا نايم على الأرض كانت تلطم ..

(عصمت يقرأ الخطاب .. لحظة صمت) .. استاذ .

عصمت .

عصمت: ما قلنا بلاش استاذ دي .

سهر: انتم بترقصوا مع البنات الانجليز ؟

عصمت: مع كله ..

سهر: سهلة يعني ؟

عصمت: جدا ..

سهر: متشكر .. تصبح على خير .

عصمت: وانت من أهله ..

(يجلب على عبده جزءا من البطانية ثم يغطي

وجهه .. تمر لحظات .. يستيقظ سهر

مرة أخرى ويكشف عن وجهه الفطاء) .

سهر: الواحد لما يحب يرقص مع واحدة .. يقول لها ايه ؟

عصمت: يقول لها تسمحي لي أرقص معاكى .

سهر: ياه .. بس كده ؟

عصمت: بس كده .

سهر: على كده بقي الحياة هنا سهلة قوى ما فيهاش عقد .

عصمت: سهل قوى لحد ما ترقص معاها .. العقد بتبتدى بصد

الرقص .

سهر: ازاي ؟

عصمت: هو انت عاوز تعرف كل حاجة في نفس الليلة اللي بتوصل

فيها ؟

سهم : توعدنی انک تفهمنی الحیاة هنا ماشیه ازای .
عصمت : انت حاتفهم لوحده .

سهم : متشکر قوی یا ابیه عصمت . . تصبح علی خیر .
عصمت : وانت من اهله یاحبیبی .

(صوت سعید آتیا من الحمام ، یهمهم لحننا
خفیفاً وهو ینغم کلماته) .

سعید : یاسلام علی الاستقلال . مع المایة السخنة . . وبعد کده
ربنا یرزقها . . وآخذ شقة لوحدی . . واطرد الواد
عصمت . یروح ینام فی الشوارع . الحمام حلو قوی
یاوله یاعصمت .

عصمت : (صائحا) اتمتع یاسیدی . . حد قدک . .
(جرس الباب) .

عصمت : (وهو فی طریقته الی الباب) . . الظاهر حاتقلب بغم
اللیلة دی .

(ینفتح الباب فیجد رجلا فی حوالی الخامسة
والأربعین من عمره ، یحمل حقيبة اوراق
صغيرة جدا . . هو محفوظ الکفراوی) .

محفوظ : السلام علیکم .

عصمت : حضرتک معاک جواب للأستاذ عصمت . . . مش کده ؟
محفوظ : لا . . .

عصمت : جای تسال علیه ؟

محفوظ : لا . . انا جای أسأل علی الأستاذ سعید ابو الحمایل . .
مش ساکن هنا برضه ؟

عصمت : (بحماس شدید) أهلا وسهلا . . انفضل . . ایوه . .
ساکن هنا حضرتک قریبه ؟

محفوظ : (داخل الشقة) .. انا محفوظ الكفراوى ... مدرس
انجيزى .. استاذ سعيد .. سعيد كان تلميذى ...
كان تلميذى فى ابتدائى .

عصمت : اهلا وسهلا .

محفوظ : هيه .. وسعيد عامل ايه دلوقت ؟

عصمت : بيستحمى .

(سعيد يرتفع صوته بالفناء)

محفوظ : قصدى عامل ايه فى لندن .. مش بيعرف انجيزى
كويس دلوقت .؟ . اوهى يكون مايعرفش .. والا
حاملص ودانه .

عصمت : آهو ماشى .. شاي يا استاذ محفوظ ؟

محفوظ : ما عندكش كباية بيرة .. وحيدا لو تعمل لى ساندوتش
جبنه .

عصمت : قوى . قوى . تحت امرك .

محفوظ : الله يخليك .

عصمت : دى حا تبقى مفاجاة الموسم لسعيد .

محفوظ : طبعا . هو لا يتصور انه حابشوفنى فى لندن .

عصمت : لا .. وفين .. فى شقته .

(عصمت يعد له ساندوتشا بسرعة)

محفوظ : حايتنطط من الفرحة ...

عصمت : الا يتنطط .. هو ماشافكش من فترة طويلة ؟

محفوظ : حوالى اربعة وعشرين سنة دلوقت .

عصمت : يا قوة الله .

محفوظ : كان عنده ايامها حوالى سبع سنين .

عصمت : (تستولى عليه نوبة ضحك) .. يا سلام .. لكن برافوا عليك انك لسه بتتابعه من يومها .

محفوظ : انا هنا في لندن بقالى سبع شهور .. كنت جاي احضر للماجستير .

عصمت : زينا كلنا .. كل المصريين اللي هنا كانوا جايين يحضروا للماجستير والدكتوراه .. وبعدين ..

محفوظ : حصل لى لخبطة في جامعة اكسفورد ، واضطريت اشتغل في ال B.O.A.C. شركة الطيران البريطانية عبر البحار .

عصمت : هو حضرتك ليك خبرة في الطيران ؟

محفوظ : والله انا خبرتي في الطيران مش كبيرة قوى .. يعنى يادوب هم الخمس ساعات اللي ركبتهم من مصر لهند .

عصمت : وهم دول شوية ياراجل . خمس ساعات مش قليلين .. الحقيقة الناس هنا بتحترم الخبرة انشا الله تكون سامة واحدة .

محفوظ : بس انا ما اشتغلتش في الطيران نفسه .. انا اشتغلت في ال Transportation Section

عصمت : اللي هو قسم الشحن .

محفوظ : عليك نور .. الاول اشتغلت Assistant proter وبعدين انزقت Porter .

عصمت : ماتقول شيال يا استاذ محفوظ .. مش هي شيال برضه ..؟ والا يعنى لما تقولها بالانجليزي حاتبنى حاجة تانيه .

محفوظ : (بحزن .. ولكن في حزنه قدر من الزيف) فيلا .. انا خدعت نفسي فترة طويلة .. لكن لما كتفى اتخلع ..

عرفت اتي باشتغل شيال .. انا .. معلم الاجيال ...
باشتغل شيال .

مصمت : الشغل مش عيب يا استاذ محفوظ .. ثم الشيال هنا
يفرق كثير عن الشيال في مصر .. على الاقل هنا بتقبض
بالعملة الصعبة .. وكتفك اتخلع ازاي ؟ شلت حاجة
ثقيلة ؟

محفوظ : ابدأ .. هاندباج .. هاندباج كبيرة . الظاهر بتاعة
تاجر شنطة .. اتضح ان فيها موتور عربية .

مصمت : موتور عربية .. ده مفترى قوى .

محفوظ : اى والله .. موتور عربية نوكسهول صغيرة .. سبت
الشركة وقعدت اتنقل من مطعم لطعم .. زى ما تقبول
كده قعدت تتخاطبنى المطاعم .. مفيش حاجة بتستخبي،
مطاعم لندن كلها عرفت انى احسن واحد يفسل اطباق
في السوق الأوروبية المشتركة .

مصمت : براقو ..

محفوظ : بس للأسف انا حاليا خالى شغل من اسبوعين .. سبت
الشغل على اثر اشاعة سرت في انجلترا ، انى باكر نص
الأطباق اللي باغسلها .

مصمت : شىء محزن . وساكن فين يا استاذ محفوظ ؟

محفوظ : والله انا كنت ساكن .

مصمت : (يقاطعه وقد فوجيء) .. كنت ساكن ؟

محفوظ : ابوه في الملحق بتاع الهوايت هاوس .

مصمت : الأوتيل اللي وراانا ده ؟

محفوظ : ايوا .. كنت ساكن مع مجموعة اولاد شبيحة .. طول
الليل جايبين منقذ وحجارة .. وشوية بوس ..

وبطرمان .. وحاجات بتولع .. وحاجات بتطفى ..
وحاجات بتهوى .. انا ما عرفش بيعملوا ايه بالضبط انا
باشتغل طول النهار وباجى بالليل مهدود .. لكن طول
ما انا نايم بالليل باسمعهم يقولوا لبعض ، مساء الخير ..
مساء الخير .. مساء الجمال .. مساء العندليب ..
وفى ليلسة صحيت لقيت الملحق كله والى .. يادوب
خرجت بالجلابية اللى على .. حتى الباسبور بتساعى
ولع .

عصمت : شىء محزن .

محفوظ : انا عارف من فترة ان سعيد تلميذى .. فيه ولد من
البلد قابلى وكلمنى عنه .. وسمعت انه حياخذ الشقة
دى من النهارده ، فقلت آجى اسلم عليه .

عصمت : ياهلا .. ده انت تشرف .. ده حايفرح جدا .

محفوظ : (بهرح) تيجى نعمل له مفاجاة ؟

عصمت : (يجاريه) .. يالله ..

محفوظ : هوه سريره فىن .. ؟

عصمت : اهو

(يخلع ملابسسه بسرعة البرق ويخرج من

حقيبة الاوراق الجلدية جلبابا يرتديه) .

محفوظ : حنام على سريره واتطفى .. واشوف حايعرفنى والا
لا ؟

عصمت : فكرة .. بس عارف ان المفاجاة دى ممكن تقضى عليه .

محفوظ : ليه ؟

عصمت : اصل الصدمة المفرحة ساعات بيبقى تأثيرها زى الكارثة
بالظبط .. بس نام انت .. انا حا اعمل له تمهيد .

(ينام على السرير ويتطفى) .

سعيد : (مغنيا من الحمام) .. وانام على سريري لوحدي ..
واتمطع .. واتقلب واهيص .

(صوت غطيظ الأستاذ محفوظ الذي استفرق
في النوم تماما) .

(عصمت ينقل بصره بين الحمام وسرير سعيد
الذي يحتله محفوظ ، يجلس على مقعد ويمسك
الباب ويحشوه ، يضغط على جهاز راديو
فتنبعث الموسيقى ، جرس الباب ، يفتح
الباب ، شاب آخر يحمل حقيبة ، ولا تكاد
ساقاه تقويان على حمله يشير له بالدخول
مرحبا ، الشاب يخرج خطابا يعطيه له ،
عصمت يشير له بان ينام بجوار الآخرين ،
الشاب يشكره بايماءة خفيفة من راسه . ثم
يخلع ملابسه ويرتدي البيجاما و ينام ، جرس
الباب مرة اخرى ، شاب يحمل حقيبة وييده
خطاب ، عصمت يتناوله منه ويشير له
بالدخول ، عصمت يذهب للباب ليفلقه ، يتردد
لحظة ثم يتركه مفتوحا ، لا ينقطع دخول الشبان
حاملى الحفائب ، كل منهم يعطى لعصمت
خطابا ، اكبر عدد يمكن تصوره من الشباب ،
اكبر عدد تستطيع خشبة المسرح ان تتحمله
الارض تمتلىء تماما باجسام النائمين ..
عصمت يقف منظما حركة المرور والنوم ..
عصمت يزحف بمقعده ومعه جهاز الراديو
والباب بعيدا عنهم الى ان يجد مكانا بجوار
الباب المفتوح .. يدخل بهدوء وهو يستمع
للموسيقى باندماج . طول المشهد ياتى لنسا

صوت سعيد مغنيا في الحمام ، انه يفنى للشقة
الجميلة وللحرية ، ولا زال يؤكد في كلماته
المنغمة على صوت الدش انه لن يسمح لاي
ضيف بدخول الشقة . شاب يقف في فتحة
الباب ومعه حقيبة ويضرب الجرس) .

عصمت : (بفضب) بتضرب الجرس ليه ؟ الباب مش مفتوح
قدامك ؟

الشاب : آسف .

عصمت : عاوز مين ؟ عصمت والا سعيد ؟

الشاب : أنا عاوز ابراهيم .

عصمت : ابراهيم مين ؟

الشاب : ابراهيم عبد الجليل .

عصمت : مافيش حد ساكن هنا اسمه ابراهيم عبد الجليل .

الشاب : هو مش ساكن هنا . . هو طلع هنا .

عصمت : شكله ايه ؟

الشاب : شكله تعبان قوى ، وكابس عليه النوم . . ومعاه شنطة

. . وماسك جواب .

عصمت : كل اللي جوه شكلهم كده .

الشاب : تسمح لي القى نظرة .

عصمت : النور مش كفاية جوه . ولو ولعت النور وقعدت تقلب

فيهم . كلهم حايصحوا .

الشاب : (يظهر بطارية صغيرة) . . ماتخافش . . انا معايا

بطارية .

عصمت : وأنا أعرفك منين . . اضمنك ازاي . . ؟ الناس اللي جوه

في عهدتى مسئولين منى .

الشاب : حاسيب رهن .. حاسيب الباسبور بتاعى .

عصمت : اتفضل .

(الشاب يعطيه الباسبور ثم يخلع حذاءه ،
يخوض فى اجسام النائمين وهو يلقى بضوء
البطارية على وجوههم .. فجأة يستولى
عليه الارتفاع وترسم على وجهه ابتسامة
عريضة . يخلع جاكته) .

الشاب : اهو .

عصمت : لقيته ؟

الشاب : لا .. بس لقيت عبده .

عصمت : عبده مين ؟

الشاب : واحد تانى اعرفه .. عبده الفطيرى .. (يزيح بعض
النائمين لكي يفسح له مكانا) .. حاريج شوية جنبه لحد
مايصحى .. بعد اذنك ..

عصمت : اتفضل ياعزيزى .

الشاب : اسمى فى الباسبور عندك .. احمد زغلول .. والا تحب
اصحيه دلوقت لو صحيته حانتبخانق ونصحى الشارع
.. اصله عليه ليه فلوس .

عصمت : وعلى ايه ياعزيزى .. الصباح رباح .

الشاب : تصبح على خير .

عصمت : حاضر .

(احمد ينام على الفور) .

عصمت : (ينهض محدثا نفسه) ما اعتقدش فيه طيارات جاية
تانى من مصر الليلة دي والمترو شطب . تقفل الباب .

(يرتب مظاريف الخطابات ثم يضع كل خطاب
فوق أحد النائمين .. كما لو كانت بطاقة
للتعريف بشخصيته) .

قصمت : (وهو يضع الخطابات) عبده . سمير محمد . مصطفى .
سيد . فاروق . على . لطفى . هشام . عمرو .

(سعيد يخرج من الحمام ملتفا في بشكير
كبير ، يفنى في حالة مزاجية رائقة ، يقف
لحظة لا يكاد يصدق عينيه ، يعود للحمام مرة
أخرى مسرعا) .

قصمت : (يناديه) .. تعالى يا سعيد ، هي دي شقتنا ؟

(سعيد يخرج مرة أخرى من الحمام) .

سعيد : مش معقول ، مستحيل .. أنا تصورت ان الحمام
يطلع على شقة تانية ايه اللي حصل ؟

قصمت : مش حاتصدق .

سعيد : لا .. حاصدق .. حصل حرب ؟ انجلترا أعلنت الحرب
علينا فهجروا المصريين على شقتنا ؟

قصمت : لا ..

سعيد : احنا أعلننا الحرب على انجلترا . . ؟ .. ودول فدائين
جاين في الاول ومش لاقين حته يناموا فيها الا شقتنا ؟

قصمت : فعسلا .

سعيد : فعسلا .

قصمت : تقريبا .. وصول المصريين لهننا .. يعتبر عملية غزو
لانجلترا .

سعيد : نعم ؟ أنا مش حا اشترك في الغزو ده .. أنا خاين ..
حاحارب مع انجلترا .. (يصيح في النائمين) انت
ياخويا انت وهو .

عصمت : المسائل ماتاخذش كده ياسعيد . دى بداية الموسم .
كل واحد جايب جواب من صديق او قريب . . كل واحد
فوقه الجواب بتاعه . تقدر تتسلى وتقرأ . . حاتكتشف
ان كان لازم ارحب بكل واحد فيهم .

(لم يلاحظ سعيد بعد أن هناك من ينام على

سريره) .

سعيد : (ينفجر فيه) . . مش ممكن حاتنفر . . حاتفضل
عصمت على طول . . عصمت النبيل . . عصمت الكبير
.. اللي بيفتح صدره لكل الناس . . عمدة لندن . .
هو انا مش عارفك . . حاتنيمهم وتلفهم . . وتشغلهم
وفي الآخر خالص ، ماتاخذش منهم كلمة شكر . . انت
متصور نفسك مين . . متصور نفسك ايه ؟ مسؤل عن
المصريين اللي هنا ؟ سفير مصر في لندن .

عصمت : انا باعتبار نفسي سفير قطاع خاص .

سعيد : طب وانا مالي يا اخي ، انا مالي تعمل لى الشقة ملجا
للمشردين .

عصمت : احنا كمان يا سعيد كنا مشردين في يوم من الايام . .
ونمنا في الشوارع وفي الجنان ومحطات المترو . . وقعدنا
ايام وليالى مامعناش بنس واحد . .

سعيد : وما حدش في كل المصريين اللي قابلونا ساعدنا .

عصمت : عشان كده لازم نساعدهم .

سعيد : بيحصل ايه بعد مابتساعدهم . اول حاجة بيعملوها
اول ما بيستقروا . . . بيعضوا ايديك .

عصمت : مش مهم . ما دام مابحسش بالعضة . . يا سعيد فيه
اعتبارات لازم نحترمها .

سعيد : زى ايه ؟

عصمت : افرض مثلا جالك واحد من اساتذتك في الدراسة .
تقدر تقول له مع السلامة ؟

سعيد : اقول له واقول لهيئة التدريس بحالها .
عصمت : (مشيراً لمحفوظ النائم) ... اتفضل . قل له .

سعيد : ايه ده ؟ مين ده ؟

عصمت : مفاجأة .. الاستاذ محفوظ الكفراوي .

سعيد : مفيش حد درس لى اسمه محفوظ الكفراوي .

عصمت : كان بيدرس لك انجليزى فى ابتدائى .

سعيد : (يتذكر بصعوبة) .. محفوظ الكفراوي .. محفوظ

الكفراوي .. (يتذكر فجأة وقد بدت تتأبه ثورة

غاضبة) .

... : ده ماكانش بيدرس لى .. ده كان بيضربنى فى ابتدائى ..

كان يدخل الحصّة ينزل فى ضرب لحد الجرس ما يضرب

.. امال انا مش عارف اتعلم انجليزى ليه .. هو اللي

عقدنى من الانجليزى .

(يسرع لمحفوظ ويكشف عن وجهه) .

سعيد : ايوه هوه .. هو بوشه العكر .. وليه عين ينام على

سريرى (يتلفت حوالياه) مفيش هنا خزانة ؟

عصمت : اعقل ياسعيد .

سعيد : (بهياج شديد) .. مش حاعقل .. ماحدث ينام على

سريرى .. مش لما يكون استاذى .. لما يكون وزير

التربية والتعليم .. محفوظ .. محفوظ انت يا محفوظ

عصمت : مفيش داعى تصحى الشارع كله .. اهدا .. مش

حايصحى .. واضح انه مانامش من جمعة .. انت مش

عاوز تنام على سرير .. خد سريرى انا حنام على الارض

سعيد : ياسلام على النبالة . ياسلام على الكرم .. لا ياسيدى

.. انا كمان عندى اخلاق .. وماقدرش ابنى سعادتى

على انقاض سمادة واحد تانى (يقترب من محفوظ
ويمسك بكتفه) .. شيل قدامى .

عصمت : دماغه تتخبط في حديد السرير . يجيله ارتجاج في المنع
نروح في داهية .

سعيد : شيل قدامى .

عصمت : حاشيله نوديه فين ؟

سعيد : حانرميه في الشارع (يلقي نظرة سريعة عبر النافذة)
الشارع فاضى خالص .. لو انا حر التصرف كنت رميته
من الشباك .. لكن طبعا حضرتك مش حاتوافق ..
ولذلك حانزل بيه السلم ونحطه على الرصيف ..

عصمت : دى وحشية ياسعيد .. سلوك غير متحضر .

سعيد : انت مالك انت .. هو ضيفك والا ضيفى ؟ .. ده تبغى
وانا حر فيه الدنيا صيف .. والجو مش برد .. عشان
يتعلم يستأذن قبل ما ياخذ سراير الناس .

عصمت : شيل قدامى .. حاشوف له حته على الارض .

(يتعاونان على حمل محفوظ ويضعانه على

الارض ، سعيد يقفز من فوره على السرير) .

سعيد : لو الوقت مش متأخر ، كنت خدت هدومى ونزلت ..
لكن الصبح انشاء الله .. مش حاشوف وشى .

عصمت : الصبح انشاء الله كله حايمشى .. ثم انت زعلان ليه
يا اخى .. مانت نايم على سريرك لوحدك . اهو .

سعيد : ميت واحد في الشقة . وطبعا حايعزفوا طول الليل ..
مش سامع السيمفونية .؟ .

عصمت : (وهو يرتدى بيجامته) انت حاتنام جعان .. مش اتفقنا
نعمل عشا مفتخر ونحتفل بالشقة .

سعيد : نحتفل بالثقة .! . احتفل انت لوحدك ... انا نفسي
انسدت ..

عصمت : (يسحب الفطاء فوقه) .. احلام هادئة ... وتصبح
على خير يا صديقي .

سعيد : لا يا شيخ .

(عصمت يضغط على مفتاح التور بجوان
السريير فتختفى الاضاءة ، لبة سهارى صغيرة
تضيء الشقة الآن ، اضاءة خافتة ، نسمع
جرس الباب .. عصمت يكشف عن وجهه
الفطاء ويعتدل في سريره) .

سعيد : نام .. نام .. ماتسالش فيه ؟

(الجرس يضرب مرة اخرى في العاح ..
سعيد ينهض في عصبية ويفيء الشقة) .

سعيد : انا حاعلمك تتصرف ازاي .. حاوريلك البجاجة على
اصولها .. (يقفز ناحية الباب وهو يصيح بصفاقة) ..
نعم يا خويا ؟ عاوز مين ياسيدى ؟ مفيش حد هنا ..
اتفضل مع السلامة .. (يكتشف ان الذى يقف امامه
فتاة جميلة ، تضطرب وقد فوجئت بطريقة استقباله
لها .. يتلعثم) ... آسف يافندم .. آسف جدا ،
لامؤاخذه اصلى افكرتك واحد زميلنا دايمًا يهزر معانا
.. اتفضلى يافندم .. اتفضلى .. اهلا وسهلا ..

الفتاة انا امال .. امال حسين .. الأستاذ عصمت موجود ؟

سعيد : ايوه يافندم .. يعصمت ؟

(امال تدخل الشقة ، عصمت ينهض
لاستقبالها) .

عصمت : اهلا يافندم .. انا عصمت .. وده زميلي سعيد .

سعيد : (يشر لسريه مبتسما) ... وده سريري .

آمال : (تضع حاجياتها على سرير عصمت) انا معايا جواب

لحضرتك من الاسناد رستم النشوقاتى .

(تجلس على السرير) .

سعيد : (يهمس لنفسه جانبا) ... الحمد لله .. قعدت على

سريره .

عصمت : اهلا وسهلا .. اخيرا افكرنى .. اخباره ايه ؟

آمال : كويس قوى .. بيسلم عليك .. انا آسفة حطيت شنطى

على سريرك .

عصمت : ده سرير الضيوف .. انا عندى سرير فى الأودة الثانية .

آمال : (يستلفت نظرها النائمين فى غرفة الصالون) ... باه

.. ده انتم عندكم ناس كثير قوى .

عصمت : لا أبدا .. اصلنا الصبح حانعمل مظاهرة ضد الامبريالية

العالمية حانطلع من حديقة هابدبارك .. فقلنا نتجمع

هنا من بالليل .

آمال : (وهى تنهض متجهة للباب) ... يا نهار ابيض .. كنت

حانسى ماجدة .

(تفتح الباب وتنادى) .

آمال : ماجده . ماجده . تعالى . اطلعى . لقيت الاسناد

عصمت موجود .

(سعيد يتبادل النظرات مع عصمت فى تعاسة

ماجدة تدخل) .

ماجده : مساء الخير .

سعيد : أهلا وسهلا .

(تضيع حقيبتها على الأرض وتجلس على

السريـر . سريـر سعيد ، ثم تخلع حذاءها) .

ماجده : لامؤاخذة .. أنا تعبانة قوى .. مانمناش من يومين ..
قعدنا عشرين ساعة في المطار .

آمال : لخبطة في مواعيد الطيران .

ماجده : مين فيكم عصمت ؟

عصمت : أنا .

ماجده : (تلفت لسعيد) .. وحضرتك ؟

سعيد : سعيد .. سعيد ابو الحمايل .

ماجده : حمايل .. ؟ .. حلوه قوى الحمايل دى .. (فجأة)

انا جعانه .. حسيت بالجوع فجأة .. والنبي ياسعيد

تقلى لى اربع بيضات . وياريت يكون فيه بسطرمة ..

(تلفت لهم) اظن مافيش هنا بسطرمة (تنظر لسعيد

المشده) ... والا اقولك .. حضر لنا اى عشا .

الموجود .

سعيد : حضرتك في كلية ايه ؟

ماجده : انا اتخرجت .. بكالوريوس تجارة ادارة اعمال .

سعيد : طبعا جاية تشتغلى مديرة بنك لندن .

ماجده : (جادة تماما) مش لازم بنك لندن .. اى بنك ممكن

أديره .

سعيد : يعجبني فيك التواضع .

ماجده : مرسى قوى .. والنبي اذا كنت حاتعمل سلاطة .

سعيد : (مقاطعا) طبعا فهموكى في المطار وانتى جاية انك حاتلاقى

واحد اسمه سعيد .. تقعدى على سريـره ويحضر لك

الما . . ويفسل لك هدومك . . وينصف لك الشقة .
ماجده : لا . . ماحدث قال لى . . لكن لو كنت ناوى تعمل كده .
انا ما عنديش مانع . والله ده يبقى كرم منك .

سعيد : (غاضبا) انتى جابة تشغلىنى باست انتى ؟

ماجده : (تحتد هي الأخرى) . . بتسميه شغل ؟ . . تحضر حنة
جبنه وتقلّى خمس بيضات تسميه شغل ؟ . . امال
الناس اللى بتهد الجبال وتشق الأنهار وتعمل المصانع
تسميها ايه ؟

سعيد : (يصرخ بأعلى ما فى صوته) . . انا اصطبحت بوش مين
النهارده ؟

(لحظات صمت تشمل الجميع) .

ماجده : (تقطع الصمت بهدوء شديد) . . انا قلت حاجة غلط ؟
انا آسفة لو كنت غلطت فى حق حد هنا .

آمال : استاذ سعيد . . ماجده بتهزر معاك . هي شخصيتها
كده . تحب تدخل فى الناس على طول .

عصمت : انت فهمتها غلط ياسعيد . هي بتكلمك بصداقة .

سعيد : انا كمان احب الناس تكلمنى بصداقة . لكن ما حبس
الناس تستغل الصداقة عشان تشغلىنى خدام ايوها .

ماجده : (بتؤده) دلوقت اتضح لى بوضوح شديد انك نفصد
تهينى . . انا اتهنت يا عصمت . . انا اتهنت يا آمال . .
اتهننت فى بلاد الفرنجة . .

(تقترب بوجهها من وجه سعيد تكاد تلتصق به) الكلمة
دى لو حد قالها لى فى ظروف تانية كنت دبحته .
اتفضل قدامى يا استاذ على المطبخ نحضر العشا سوا . .

آمال : نحضره أنا وانت ياما جدده .

عصمت : اسمعوا يا جماعة .. دى اول ليلة لنا فى الشقة . وكنا
حانحضر عشا مفتخر عشان نحتفل بالناسبة دى .
اعتبروا نفسكم ضيوفنا .. أنا وسعيد اللي حانجهز
العشا .

ماجدده : مش حاتعرفوا ..

آمال : الشهادة لله .. ماجده طاهيه ماهرة .

ماجدده : (لسعيد الذى لا زالت تنظر له بحده) .. اتفضل
معايا يا استاذ على المطبخ .

سعيد : (يصرخ فيها) .. مش داخل مطابخ ..

عصمت : خلاص يا جماعة .. مش عاوزين تفسد المناسبة الجميلة
دى .. أنا حاساعدك .

ماجدده : لا .. أنا عاوزه الأندى ده .. عاوزه اتواجد معاه فى
مكان فيه آلات حادة .. سكاكين على شوكة على مطاوى
.. عشان يحرم يستعمل كلمة خدامين ابوها .

سعيد : (يتنسم بالرغم منه) .. أنا آسف ..

ماجدده : اتفضل قدامى .

(يدخلان المطبخ وعلى الفور يرتفع صياحه) .

ص/سعيد : آى .. لا .. أرجوكى .. السلاح يطول .

عصمت : صدقتك دى ظريفة جدا .

آمال : بتصرف على انها صديقة لكل الناس .. ويحصل لها
متاعب كثير قوى نتيجة لكده .

عصمت : زميلتك فى الكلية ؟

آمال : ايوه ..

(عصمت يعد المائدة) .

عصمت : الأستاذ رستم النشوقاتى يقرب لك ؟

آمال : لا .. بس يشتغل مدير مكتب بابا .. بابا وكيل وزارة
الصحة ... ووالدك .. ؟ ..

عصمت : والدى انا .. ؟

آمال : ايوه ..

عصمت : برضه وكيل فى وزارة الداخلية . بس مش وكيل وزارة
وكيل امباشى . اظن تفرق كثير .

آمال : لا ابدا .

عصمت : لا ابدا ازاي . دى تفرق مائة وثمانين جنيه على الاقل
فى الشهر .

(صوت سعيد من المطبخ) .

ص/سعيد : اذا كان مضايقتك اطلعه بره .

ص/ماجده : ياريت تروق المطبخ عشان اتحرك بسهولة .

(سعيد خارجا من المطبخ حاملا احد النائمين)

يلقى به على الارض ثم يعود الى المطبخ) .

آمال : طول عمره كان وكيل امباشى ؟

عصمت : لا .. طبعا .. بدأ عسكري .. وحقيقى اترقى بسرعة

.. يعنى فى ظرف خمسة وعشرين سنة بقى شاويش

.. وبعدين ساب الداخلية .. واشتغل مدنى .. كنت

انا لسه صغير .. لكن مانساش فرحة امى ، والجيران

والشارع . والبلد والمنطقة .. خلاص بقى حاسيب

العسكرية ويبقى افندى . لا يطلع دوريات ، ولا يسهر

فى القسم للصبح ، افندى يعنى ، عادى .. زى اى

موظف في الدولة . ياخذ رشاوى . . ويروح الساعة
اتنين . . ولما يموت ياخذ معاش . . قصدي احنا اللي
ناخده .

(سعيد يخرج من المطبخ وهو يحمل شخص
آخر . . يلقي به على الأرض . . ثم يكلم
عصمت)

سعيد : كنه الا البوتاجاز يا عصمت . . ما حدش ينام على
البوتاجاز . .

(يختفي داخل المطبخ)

عصمت : (يواصل) . . عينوه درجة تاسعة . . ومات بعد ماخذ
التامنة بأسبوع طبعا الأسبوع ده نفعا في المعاش . . انا
واخواتي خدنا تسعة صاغ زيادة كل واحد .

آمال : ماساه . . الله يرحمه كان . .

عصمت : كان حاجة واحده يا آنسة آمال . . كان صديقي

(سعيد يخرج حاملا احد النائمين من المطبخ)

آمال : الظاهر المطبخ عندكم واسع قوى .

عصمت : سبعين سنتي في ربع متر .

ص/سعيد : وسطى انقطم . . مش عارف اخرج الباقي . .
نسيبهم بقى نايمين للصبح .

(يخرج هو وماجده حاملين الأطباق ويبدأن
في رصها)

عصمت : تسلم ايديكي .

ماجده : مرسى قوى .

سعيد : حقيقي يا عصمت . . نفسها حلو قوى في المطبخ .
طريقتها في تحضير العشا تغفر لها حاجات كثير قوى .

(الأستاذ محفوظ يستيقظ وهو لا زال
يغالب النعاس ، يجلس في مكانه ويمد يده
ويشاركهم في الطعام ، بقية النائمين، وبنعومة
شديدة وبهدوء تام ، يقومون من نومهم ثم
يحيطون بالأكل فيدمرونه في الحظات ..
يعودون للنوم بنفس الهدوء .. لحظات
صمت طويلة)

عصمت : الحمد لله .. أنا عموما ما احبش اتقل قبل النوم .

ماجده : وأنا كمان كنت لقمه في المطبخ .

آمال : كويس انهم اتعشوا .. عشان يعرفوا يمشوا الصبح في
المظاهرة .

سعيد : مظاهرة ايه ؟

آمال : مش عندكم الصبح مظاهرة ضد الامبريالية .. ؟ ..

سعيد : آه .. آه .. تصبحوا على خير .

آمال : يا خبر .. هو احنا حناخد سرايركم ؟

عصمت : ولا يهملك .. خدوا راحتكم .

ماجده : وانت حاتنام ازاي يا سعيد ؟

سعيد : انا ما بنامش على السرير .. عندي تصلب في العمود
الفقرى .. بنام وانا واقف .

(يأخذ غطاء ويترك غرفة النوم ، يستند

بظهره للحائط ، يتغطى وبنام واقفا ، عصمت

يفسح لنفسه مكانا وسط النائمين)

عصمت : (يتبادل الحوار همسا مع سعيد) .. ما تبجي جانبي

يا سعيد .. فيه حته فاضبه جنبى بتاع عشرين

سننى ..

سعيد : (بهنوء اليائس) .. نام يا عصمت .. نام قبل ما آجى
أديحك ...

عصمت : يا جدع روق .. ما تضايقتش نفسك .. الصبح حامشى
لك العالم ده كله .

(يرتفع شخير كل النائمين جميعا .. يخفت
الضوء .. تنزل ..)



— الستار —

**** سهر الليل ****

www.liilas.com/vb3

الفصل الثاني

المشهد الأول

(عندما تفتح الستار ، تكون الاضاءة خافته
ولا زال الجميع نائمين ، ضوء النار يبدأ في
التسرب من خلال النوافذ ، سهر يستيقظ
ينهض ، يتأمل ما حوله ، ياخذ طريقه للحمام
يسترعى انتباهه وجود الفتاتين النائمتين
يحدث لحظات في آمال ، يتركها ويقف امام
ماجده ، يتردد قليلا ثم يهزها برفق ..
تستيقظ وهي تفرك عينيها وتتأهب ، تنظر
له بدهشة)

سهر : good morning.

ماجده : (ولم يفارقها النعاس بعد) good morning Sir

سهر :

Would you please, would you please, dance with me

ماجده : Yes, with pleasure.

سهر : Thank you, when ?

ماجده : As you Like ... بس على الأقل تسنى لما

اغسل وشى .

سهر : (وقد هزته المفاجأة) .. هو حضرتك مصرية ؟

ماجده : ايوه .. انا مصرية قوى .. مصرية بشدة .

سهر : أنا آسف جدا .

ماجده : آسف جدا ليه .. انت مش عاوز ترقص ؟

سهر : ايوه .. بس اصلى افكرتك انجليزية .

ماجده : وحصل ايه لما طلعت مصرية .. ؟ .. مش حاعرف
ارقصك يعنى ...

سهر : أنا آسف جدا .. اصل يعنى .. قالولى فى مصر (يزداد

تلعثمه) .. لما الواحد يرقص مع واحده انجليزية ..

ماجده : يحصل ايه ؟

سهر : يعنى .. بعدها ..

ماجده : آه .. فهمت .. انت مش عاوز ترقص .. انت عاوز

حاجه تانيه .. آه يا وغد

سهر : (بفزع) .. لا والله .. لا والله العظيم .. أنا آسف
جدا .

(يستيقظ عصمت ، يكشف الفطاء عن وجهه

ويصيح من مكانه)

عصمت : ايه يا سهر لا بتعك ايه عندك ؟

سهر : لا ابدا ..

ماجده : لا .. ما فيش حاجه يا عصمت .. ده عاوز يرقص

مع ايا .

عصمت : وبصدين ؟

ماجده : ابدا .. قلت له استنى لما اغسل وشى .

سعيد : ينام جالسا وقد تكور على نفسه . يرفع الفطاء عن

وجهه) .. ايه يا اسيادنا على الصبح .. عاوزين ننام

.. (لسهر) ايه يا حبيبى .. مش تهبط شويه كل اللى

فكرت فيه في مصر حايحصل . ما تستعجلش . وبلاش
زيطه . غاوز انام .

(يفتى وجهه مرة اخرى . يبداون في
الاستيقاظ . الحركة تدب في الجسميع ،
ما عدا عصمت وسعيد . . طابور يقف امام
الحمام ، بعضهم يدخل المطبخ البعض الآخر
يفتح ريكوردات صغيرة ، ترتفع على الفور
اصوات بعض الاغانى المصرية . تتناثر
تعليقاتهم)

- ... : فردة شراب حمرا .
- ... : الساعة بتاعتى يا حضرات .
- ... : وبتقلعها من ايدك ليه ؟
- ... : اعمل لك ساندوتش جبنة يا محسن ؟
- ... : فردة شراب حمرا .
- ... : ساعة مين دى ؟
- ... : ورينى . . مش بتاعتى . . يبقى فيه حد خد ساعتى
وساب دى .

(طابور طويل امام باب الحمام . محفوظ
يقف في اوله)

- مخفوظ : انت يابنى ياللى جوه . شهل شويه . . ساعة في الحمام ؟
- ... : فردة شراب حمرا .
- مخفوظ : انت يابنى ياللى جوه .
- ... : احم .
- مخفوظ : هو ايه اللى احم . . شهل شويه . . المترو حافوتنا .

... : أنا بوجه آخر انذار .. فردة شراب حمرا .. دوروا
معابا يا حضرات .

... : مين حايطر بيض مقلى ، ؟ . ومين حايطر بيض
مسلوق ، ؟ .

محفوظ : اللي يستعمل حاجه يفسلها .. مفيش هنا خسدامين
ابوكم .. عشان يفسلوها انت يا أخينا ياللى جوه .
(عبده الفطيرى يخرج من الحمام . يشتبك
معه محفوظ)

محفوظ : كنت بتعمل ايه .. ؟ .. بتولد ؟

عبده : كنت باغسل فانه .. وشراب .

محفوظ : ده انت رزل قوى يا أخى . شايف المسألة رايقه توى
يعنى .

عبده : أما راجل قليل الحيا صحيح . حسن الفاظك . يعنى
ايه رزل ؟

(يمسك فى خناقه)

محفوظ : انا قليل الحيا .. يا قليل التربية ..

(احمد يندفع من وسط الطابور ليدخل
الحمام منتهزا فرصة الخنافة ، محفوظ
يترك عبده الفطيرى ويشتبك معه)

محفوظ : بالدور يا أخى . حدق قوى يعنى . مش تبطلوا الفوضى
دى ؟

احمد : ما أنا شايفك بتتخناق .. قلت أدخل أنا على ما تخلصوا
خناق .

(يتفرس فى وجهه)

محفوظ : هو انت .. ايه اللي جابك هنا .. ؟ .. جاي تواع فى
الشقة دى كمان مش كفايه حرقوا الأوتيل .

(احمد يخلص نفسه ويندفع داخلا الحمام)

محفوظ : كده .. طب ودينى لكاسر عليك الباب .

عصمت : (يكشف الفطاء عن وجهه) .. اصطبجوا .. وطوا
الريكوردات دى .. احنا مش فى قهوة فى درب الحمامين

محفوظ : اخرج يا احمد .. حاتخرج والا اكسر عليك الباب .

ص/احمد : طب اكسره .. اكسره وانا البسك جناية .

عبد : باب ايه اللي حاتكسره . انت باين عليك راجسل مش
طبيعى .

محفوظ : اخرج يا احمد باقولك .

(سعيد يهب من نومه صارخا)

سعيد : دى مش قهوة .. دى ميضة . حاتحترم نفسك انت
وهو والا انزل فيكم ضرب .

(محفوظ يحاول كسر الباب ، احد النسيان

يجذبه من الخلف ويلتحم معه ، تنفجر المعركة

تتسع الحلقة ، يسكون فى خياق بعضهم

البعض ، يتعالى صياحهم ، صوت جرس

التليفون ، عصمت يلتقط السماعة)

عصمت : آلو .. (يسد اذنه) .. خفوا يا فجر . مش سامع

حاجة .. الولية صاحبة البيت بتتكلم .

(تخفت اصواتهم)

عصمت : No, that is not true ...

ما حصلش والله العظيم .

(يلتفون حوله فى ترقب ، يضع السماعة)

عصمت : قفلت السكة . الجيران اشتكوا لها من الزيته اللي انتوا

عاملينها .. حاتكون هنا فى ظرف دقيقتين .. لو جت

ولقيتكم .. حابر حلونا بره انجلترا في ظرف ستين ثانية
من دلوقت ، حاتكونوا بره الشقة .. (صائحا) ..
يا الله ...

محفوظ : حانزل الشارع بالجلابية ؟

سعيد : انت حاتناقش ؟ اتفضل يا محفوظ افندي .

محفوظ : الوش ده مش غريب على (يتذكر) سعيد .. سعيد

أبو الحمايل .. (يقترب منه متهللاً) ازيك يا سعيد ..
عامل ايه في الانجليزي ؟

سعيد : بالله يا استاذ .. هو ده وقته .. بالله .

أمال : واحنا كمان . ؟ . حانروح فين ؟

ماجده : ده انا عاوزه ربع ساعة على الاقل عشان أعمل مكياج .

عصمت : (وقد وصل لحل) استنوا انتم .. انا حاتصرف ..

(يحثهم على الاسراع) .. بالله يا سيدى انت وهو ..
ابقوا نعالوا بعد الوليه ما تنزل .. بالله كملوا لبس في
الشارع .

(يندفعون خارج الشقة .. عصمت بعيد

ترتيب الشقة في سرعة ، سعيد يساعده ،

ثم يراقب الشارع من خلال النافذة ..)

عصمت : الحل الوحيد . انكم تمثلوا دور الجرل فريند
(girl friend) بتوعنا .

أمال : جرل فريند يعنى ايه .. ؟ .. اصحابكم يعنى ؟

سعيد : الجرل فريند هنا ، نوع من العلاقة ، أكثر من الصحوية
سنة .. وأقل من الجواز سنة .

عصمت : ودى علاقة محترمة قوى هنا . ولذلك بمجرد ما الست

تيجى ، تروحوا نازلين فينا بوس ..

ماجده : (مستنكرة) .. نعم .. لا ياخويا العب غيرها .
سعيد : (ساخطا) .. يعنى ايه تلعب غيرها .. هى لماضه وبس
.. عاوزينا نطرد من الشقة ؟

آمال : حتى لو الست شافتنا واحنا فى حالة حب ، حاتعرف
ان ده تمثيل .. لان مش معقول الحكاية دى تحصل

الصبح .

عصمت : مع المصريين تحصل .

ماجده : تضمن لى انه يكون تمثيل .. نتفق فى الاول .

سعيد : الله .. دى بتلكك .. تمثيل طبعاً . بس لازم يكون
متقن .. عشان يبقى مقنع .

ماجده : والله ما حد بيتلكك الا انت .

سعيد : (يصيح وهو يرافب النافذة) .. وصلت ..

(سعيد يفتح الباب، الفتاتان تقفان صامتتين
سعيد وعصمت يقتربان منهما ببطء شديد
وقد استولى على الجميع اضطراب خفيف
.. كل منهم ينظر فى عين الآخر برقة وخجل،
لقد بدأوا يدركون بحس غريزى غامض ان
هذه التمثيلية ليست الا مقدمة لمرحلة هامة
فى حياة كل منهم ، يزداد اقترابهم .. تخفت
الاضاءة اظلام)

**** سهر الليل ****

www.liilas.com/vb3

المشهد الثاني

(المشهد التالي ، بالنسبة لفرق الهواه ،
يجب أن تقدمه كما هو ، اما بالنسبة للفرق
المحترفة ذات الامكانيات فيجب ان يعاد
صياغة المشهد كله ، بحيث يتحول الى تابلوه
غنائي راقص المجموعة كلها موجودة على
المسرح)

قصمت : اسمعوا يا حضرات ، باختصار شديد ، حضراتكم جايين
هنا ، عشان تشتفلوا .. وتفرجوا على الدنيا ..
وتعملوا قرشين ..

الجميع : طبعا .

سعيد : المسائل هنا مش سايبه .. مفيش فوضى .. عشان
تشتفلوا لازم يكون معاكم عقود عمل ، حد فيكم معاه
عقد عمل ؟

الجميع : لا ..

سعيد : خلاص .. تروحوا ..

الجميع : مش حانروح ..

قصمت : تأشيرة الدخول اللي معاكم ، تأشيرة سياحية .. بتسمع
لكم بالاقامة في لندن شهر واحد .. بالكثير ، ثلاثة ..

سعيد : كل واحد يبص لويس في الباسبور بتاعه . . مكتوب ايه ؟

الجميع : غير مسموح بالعمل بأجر او من غير اجر .

عصمت : ومع ذلك . . لازم تشتغلوا . . وحاشتغلوا .

آمال : والقوانين ؟

ماجده : والاقامة ؟

سمير : وتصاريح العمل ؟

عصمت : عبقرى اللى بيعمل القوانين . . بس فيه عبقرى تانى . .

اكثر منه عبقرية .

الجميع : هو مين ؟

سعيد : اللى بيدور حوالياها . . اللى بينط فوقها . . اللى

يفوت من تحتها . .

الجميع : ما حدش يعرف يعمل الحكاية دي في الدنيا زينا .

عصمت : نبتدى خطوة ، خطوة ، اصحوا معايا . . اول مشكلة .

الجميع : الاقامة .

سعيد : (يقرأ في كتاب صغير) . . مسموح بالاقامة بسبب

الدراسة .

الجميع : هو احنا جاين نشتغل ، احنا جاين ندرس .

عصمت : خطوة نمرة واحد . . حاتقدموا في مدرسة لتعلم اللغة

الانجليزية . . والاستمارات ايه .

(يفتح حقيبة ويخرج منها عشرات الاستمارات

يلقيها عليهم)

سعيد : المدرسة حاتديكم جوابات انكم مقيدين فيها .

عصمت : خطوة نمرة اتنين . . حاتأخذوا الجوابات دي ، وتطلعوا

على ادارة الجوازات والجنسية . .

(الاثنان يبدآن مسرحية صغيرة داخل

المسرحية سعيد يجلس الى مائدة صغيرة

ويضع على رأسه قبعة . عصمت يقف أمامه

باحترام شديد . كلاهما ينطق العامية

المصرية بلكنة أجنبية ، عصمت يمسك

بباسبوره وبيضة أوراق . يقدم له ورقه)

سعيد : (يفحص الورقة) . . . مسر عصمت .

عصمت : Yes Sir

سعيد : عاوز تجدد الإقامة ليه ؟

عصمت : عشان اتعلم انجليزى .

سعيد : Very good, very good كويس كثير .

عصمت : انا باحب اللغة الانجليزية .

سعيد : Very good, very good لما كل الناس

تتكلم انجليزى . . انجلترا تيجى مبسوط كثير . . في

مدرسة ايه يا مسر عصمت أ

عصمت : (يقدم له ورقة اخرى) . . في مدرسة بيكاديللى المسائية

لمحو الامية الانجليزية .

(عصمت يختتمها بختم وهمى)

سعيد : بتجيب فلوس منين يا مسر عصمت أ

عصمت : خير ربنا كثير يا خواجه .

عصمت : (للمجموعة) . . وتروح مطلع مائتين جنيه .

(عصمت يخرج من جيبه رزمة اوراق مالية

يقدمها له ، يراها سعيد ويميدها له مرة

(اخرى)

سعيد : ثلاث شهور كمان اقامة للمستتر عصمت .

عصمت : Thank you very much indeed

(سعيد يمثل انه يكتب شيئا في الباسبور ثم

يختمه)

الجميع : وحانجيب المتين جنيه منين ؟

عصمت : اهم ..

(يخرج من الدولاب رزمة اوراق مالية)

سعيد : كل واحد فيكم يرد على الموظف بثقة وهدوء .. بلا اى

اضطراب ، اتفضلوا ، ورونى ..

(يقفون طابور امام سعيد الجالس .. كل

منهم يحمل الباسبور واوراق صغيرة ..

الشخص الواقف اول الطابور .. يقدم

الباسبور والشهادة والنقود سعيد يختمهم

له)

عصمت : بسرعة ، بسرعة ورشاقة .. وبعد ما تخلص .. تناول

الفلوس للى وراك .. وهكذا ..

... : ولو الموظف كشف اللعبة دى ؟

عصمت : ساعات الموظف بيكشف اللعبة .

(سعيد يمك برزمة الاوراق المالية)

سعيد : اوه .. انا شفت الفلوس دى قبل كده ..

The rat is playing in me

الفار بيلعب في عبي you Egyptian مش ممكن

Egyptian فوريجي بضحك على موظف انجليزى . .

انا لازم اعلم الفلوس دى .

عصمت : في الحالة دى حايطط علامة على اول عشرة جنيهه . .

حايمضى عليها . . بأسرع من ملح البصر كل واحد يكون

جاهز بعشرة جنيهه تانية يحطها على اول الفلوس . .

وطبعا الحركة دى عاوزه تدريب .

سعيد : حانسبيكم تتدربوا عليها جمعة .

المجموعة : برضه المشكلة لازالت قائمة . . مفيش معانا تصريح

بالعمل .

عصمت : مش لازم . المطاعم واللوكاندات حاترحب بيكم . . حاتدفع

لكم اجور هايفة وتشفلكم مائة ساعة في اليوم (جادا تماما

وكانه يقود معركة) . . والان ايها السادة . . علينا ان

ننجح فيما فشلنا فيه القوات الالمانية . . علينا ان نفرزوا

لندن .

الجميع : (يرفعون ايديهم بالتحية النازية وهم يصيحون في تجهم)

هايل عصمت ، هايل عصمت .

سعيد : ايوا . . اضحكوا على نفسكم . سموه غزو . . احنا جاين

هنا نخدمهم . . خدمناهم سبعين سنة . . ولما سابونا . .

طلعنا نجرى وراهم . عشان نخدمهم برضه .

عصمت : (يحضر ورقة كبيرة يفردها على المائدة وكانها خريطة)

اسمعوا يا جنرالات .. عملية غزو لندن كانوا يسموها في

الحرب الثانية Lion Sea

سعيد : سبع البحر .

عصمت : احنا حانسمى الفوز بتاعنا Lion Bromba

سعيد : سبع البرمة .

المجموعة : هايل عصمت .. هايل عصمت ..

(عصمت يشرح على الخريطة بهيستريا

هتارية وبحركات محموه ، سعيد يساعده

في الايحاء بجو القتال بالمؤثرات الصوتية التي

يصدرها بغمه ..)

عصمت : لندن .. اوه .. لندن .. المرطونات يهجموا في الأول

.. يمهّدوا أرض العمليات .

سعيد : يكتسوا المطعم .. ويمسحوا البلاط .. ويسبقوه ..

ويلمعوه ..

عصمت : السفرجية وراهم .

سعيد : يرصوا الشوك والمعالق .. ويحطوا الأطباق ..

عصمت : بعد كده الجرسونات بقتحموا المواقع مقشرة .

سعيد : سنولوا على البقشيش كله ..

الجميع : هايل عصمت .. هايل عصمت .

(يهلون ويتصايحون وهم يسرون بخطوة

أشبه بمشية الأوزة ، يفادرون المسرح ..

تتغير الاضياء مع الموسيقى اشارة لمرور زمني)

(يدخل عصمت وآمال ومعهما بعض

الحاجيات آمال تخرج بعض الملابس من

اكياسها وتفحصها باعجاب) .

آمال : ظريف قوى البلوفردة .

عصمت : فعلا .. لكن برافوا عليكى .. ما بتضيعيش فلوسك على

الفاضى . كل يوم بتشتري حاجة .

آمال : انا حظى كويس ، بيطلع لى بقشيش كثير . يعنى انشاء

الله فى ظرف سنة حاكون جبت كل اللي انا عاوزاه .

عصمت : انتى مش حاترجعى مصر اول الشتاء ؟

آمال : ارجع اعمل ايه . ؟ . القوى العاملة مش حابعت لى قبل

سنة .

عصمت : (ضاحكا) على كده آخر السنة ، حاتحتاجى طيارة

خاصة ، حايفتكروكى تاجرة شنطة .

آمال : المحلات هنا فيها حاجات تجنن .

عصمت : اغلبها موجود فى مصر .

آمال : بس غاليه .. غاليه نار ؟

عصمت : احنا سرحنا .. اتنين وربع دلوقت . . يادوب على ما ناخذ

الاندرجر اوند احنا حانخلص الساعة ثمانية النهاردة . .

تجبنى نروح سينما ؟

آمال : باتضايق من السينما . مفيش ترجمة على الشريط .

عصمت : ندخل مسرح . فيه مسرحيات . الانجليزى بتاعها سهل .

آمال : مسرح . ؟ . ده أنا ماباشوفش مسرح فى مصر الا نادر .
باشوف كل مسرحيات فؤاد المهندس . شويكار بتلبس
فساتين حلوة قوى .

عصمت : نشوف باليه ؟

آمال : مصاريف على الفاضى .

عصمت : خلاص . نروح حتة نتعشى ونرقص . .

آمال : صح . . بس ادفع نصيبى فى العشا . انجليزى .

عصمت : المرة دى أنا عازمك . . ابقى اعزمينى يوم تانى . .

آمال : حقيقى يا عصمت ، أنا مش عارفة اودى جمالك دى كلها
فين ؟

عصمت : ما تقيش عبيطة

آمال : ادتنى سريرك . وشفلتنى فى مكان كويس . ومش مخلينى

محتاجة حاجة . . اخويا نفسه ما كانش حايفحافظ على

كده . حقيقى ساعات باحس انك اكر من اخويا .

عصمت : هو أنا اطول يا آنسة آمال . . اطول انى ابقى اخوكى .

آمال : ايه حكاية يا آنسة آمال . ؟ . عاوزنى اقول لك يا استاذ

عصمت ؟

عصمت : لا أبدا . . بس صدقيني ، ساعات باحس ان فيه حاجز

بينى وبينك .

آمال : الحاجز ده فى عقلك أنت . عشان كده باحس ساعات انك

بتعاملنى شويه رسمى .

عصمت : مش للدرجة دى .

(يسرح قليلا)

آمال : سرحت ... بتفكر في ايه ؟

عصمت : ولا حاجة .

آمال : انا بقى بافكر في حاجة . عارف هي ايه ؟

عصمت : خير ؟

آمال : انا باحس انى بأعرفك من سنين . الدرجة انى مش متصورة انى حايجى اليوم اللي حاسافر فيه مصر . وانت تستنى هنا . مش معقول حاتفصل في لندن طول عمرك . مسيرك حاترجع مصر .

عصمت : باحلم بمصر يا آمال . باحلم بالنيل واصحابى على القهوة . باحلم بالشوارع لكن عاوز اقولك حاجة .

آمال : عاوز تقول لى انك سعيد هنا .

عصمت : ابقى كداب .. انا بكالوريوس تجارة .. وكنت وصلت لرئيس قسم فى الوزارة باشتغل هنا جارسون .

آمال : وده عيب .. ؟ .. فيه معاهد بتطلع جارسونات .. وبتدى بكالوريوس زى بتاعك بالظبط .

عصمت : يا ريت كنت اتخرجت منها .. على الاقل كان حايبقى ده مستقبلى .. كنت حاترقى لحد ما اوصل لمدير اوتيل .. وده مركز مش قليل هنا .. لكن انا وصلت لجرسون بالعافية .. ومش مسموح لى اترقى خطوة واحدة بعد كده .. باشتغل ثمان ساعات فى اليوم . ثمانية ساعات فى ستين دقيقة لكن بصى فوق الدولاب . دى خرطوشة

سجائر . المطبخ فيه شاي وسكر . . ولحمة ومكرونة . .
جزمى سليمة وجديدة . . مش حاتلحق تدوب . . اعرف
أشترى غيرها فورا . . الشقة دى لقيتها فى ربع ساعة . .
مادفمتش خلو . . بافتح الحنفية بتنزل مايه . . مايه
سخنة . ومايه بارده حاتزل دلوقت انا وانتى حاتلاقى
مكان فى الاندروجراوند . . ساعات القطر بيبقى زحمة .
لكن دايمافيه مكان . باروح متاحف . باشوف سينما . .
بادخل مسرح . باسمع مزيكة . باعمل رحلة فى نهاية
الاسبوع . صحيحمش باحوش فلوس كثير . . لكن انا
عاوز فلوس كثير . انا عاوز اعيش . . اعيش زى الادميين
 . . واعتقد انى دلوقت عايش زى البنى آدميين . . حاجة
واحدة بس اللى بتولنى . . كان نفسى يتحقق لى كل ده
فى مصر .

آمال : ممكن .

قصته : حاولت المستحيل . ما امكش . . عملت كل السلفيات
الممكنة . كل الأوفرتايم الممكن . انا جيت هنا فى اللحظة
اللى اكتشفت فيها انى لازم اتحول للص . . او مرتشى .

آمال : وبعدين ؟

قصته : هو ده السؤال . . وبعدين . ؟ . فى عز ما انا مبسوط . .
فيه حزن غريب قوى بيهاجمنى . . فيه شىء مهم قوى
ناقصنى . . شىء لا يمكن الاستغناء عنه . . شىء . . الحياة
نفسها تفقد طعمها من غيره وتتحول لكيان مزيف .

آمال : الحب أ

عصمت : لا .. مصر .. (لحظة صمت ، يغير الموضوع بسرعة
وبلهجة مختلفة) يا الله يا آمال .. القطر حافوتنا .

(صوت اقدام سريعة على السلام ، ضحكة
نسائية ثم صوت سعيد .. آى .. آى ..
يا مجنونة يدخل سعيد وفي اعقابه ماجدة) .

سعيد : ده شىء ما حصلش .. ماتضمنش حا تعمل فيك ايه فى
اى لحظة تشنكلك تقرصك .. تصورالنهاردة .. عندنا
اف .. of يوم راحة زى ده الواحد يرتاحه .. بنامه
.. امال هو راحه ايه .. صحتنى الصبح الساعة سبعة
وودتنى متحف .. متحف فيه ايه أ شجر وسمك ..
معمولين من الحجر .

ماجدة : يا جاهل .

سعيد : ماسكة الخريطة .. وعارفة الحوارى والشوارع .. أنا
بقالى هنا سنين .. وماعرفش الا الشارع اللى فيه
المطعم .

عصمت : تحمد ربنا اللى لقيت واحدة تنجرك .. السلام عليكم ..
مش حانعرف تقعد معاكم .

آمال : باى .. باى ..

(سعيد يدخل الحمام ، عصمت يسبقه
فى الخروج ماجدة تستوقف آمال لحظة عند
الباب ، يتبادلان الحديث همسا) .

ماجدة : اخبارك ايه ؟

آمال : ما تخافيش على اختك . مش حانزل مصر بأيدى فاضية .

ماجدة : حصل أ

آمال : حا يحصل . فى طريقه للحصول .

ماجدة : عصمت شاب كويس قوى .. ناريت تحافظى عليه .

آمال : طبعا .. بس مش عارفة ماما حاتقول ايه ؟

ماجدة : حاتقول ايه فى ايه . لا .

آمال : اصل عائلته يعنى ...

ماجدة : عائلته ... ؟ ... كتك خيبة انتى وامك .

(صوت عصمت صائحا بعد ان وصل الى

الباب الخارجى) .

عصمت : بالله يا آمال .. لازم يعنى الكلمتين تنوع السلم .

(آمال تختفى ، ماجدة تعلق الباب خلفها

سعيد يخرج من الحمام) .

سعيد : فرصة العمر . حنام شوية على السرير قبل ما اى حد من

الأوغاد يبجى ..

ماجدة : مفيش نوم يا استاذ ، فيه محاضرة مهمة جدا عن مستقبل

الحضارة . حانحضرها

سعيد : افندم . لا . انا عارف اشوف متقبلى لما اشوف مستقبل

الحضارة .

ماجدة : مش حاتعرف تشوف مستقبلك الا اذا اهتميت بمستقبل

الآخرين (تفحص كتيبات ونشرات صغيرة) انت خريج

ايه يا سعيد ؟

سعيد : انا مش خريج كلية الطب .

ماجدة : (وقد سرتها المفاجأة) .. يعنى دكتور ؟

سعيد : لا .. قعدت سبع سنين وخرجت من سنة تانية .

ماجدة : ليه لا

سعيد : من غير ليه . اكتشفت انى ما نفعش دكتور . . . انا بالكثير
انفع عيان .

ماجدة : (وهى تعلم بالقلم فى كتيب صغير) حظنا من السماء .
بعد المحاضرة حاندخل سينما . وبالليل نروح الأولدوتيش
فرقة شكبير المسرحية . . فيه ماتنيه النهاردة . .
وبعد كده نروح نتعشى وترقص . . ايه رايبك ؟

سعيد : ماحى انا مش عاوز اضحك عليكى . . انا ما عرفش انجليزى
كويس . والانجليزى اللى كنت باعرفه نسيته من يوم
ما جيت هنا . . باشتغل مع مصريين وعابش مع مصريين
. . . لا انا حافهم المحاضرة . . ولا حافهم الفيلم . .
ولا حافهم المسرحية .

ماجدة : حاتحاول تفهم .

سعيد : انتى انسانة غريبة . . كل البنات اللى عرفتهم هنا
بيتفرجوا على الفتارين فى المحلات بس .

ماجدة : قبل ما ارجع مصر بعشرة ايام . . حاتفرج على
الفتارين (لحظة صمت) سعيد .

سعيد : ام .

ماجدة : انا عاوزة اسالك سؤال . . بس تجاوبنى عليه بصراحة .

سعيد : اتفضلى .

ماجدة : لما الست صاحبة الشقة جت هنا . واحنا كنا . . (تتردد)
. . كان . . كان . . تمثيل ؟

سعيد : (لحظة صمت) . . كان تمثيل فعلا . . بس لو حصل
مرة تانية . . حايكون حقيقى .

ماجدة : تفتكر كده . ؟

سعيد : متهيالى

ماجدة : اطمئن مش حايحصل تانى

(تنظر له بابتسامة عريضة ، جرس
الباب ، سعيد يفتح الباب ، يدخل محفوظ
وقد انحنى انحناءة هائلة واتخذ جسمه شكل
الرقم (٢) ، يحرك يديه بشكل آلى كما لو
كان يقوم بغسل أطباق وتجفيفها . .)

سعيد : ايه ده يا محفوظ افندى . . مالك ؟

محفوظ : ستة آلاف طبق من الصبح لحد دلوقت . . وسطى انقطم
قدام الحوض .

ماجدة : حوض ايه يا محفوظ افندى . . فيه ماكينات اوتوماتيك .

محفوظ : عطلت عشان حظى النحاس . . الصيب فى انا . . ماباعرفش
اغسل الاطباق الصينى . . بتكسر منى . . عصمت الله
يستره شغلنى فى المطعم بتاع شركة فورد . . الاطباق
اللى فيه بلاستيك . ميلامين .

سعيد : تبقى مشكلتك اتحلّت .

محفوظ : للأسف الحوض واطى . قريب من الأرض . الظاهر معمول
كده عشان يقف عليه عيل صغير .

سعيد : تجيب كرسي وتعدى قدام الحوض .

محفوظ : الراجل مدير المطعم . . شرس . . محرم . . محرم حد
يقعد فى المطبخ . . بيرفد على طول .

(فى اثناء حوارهما ، لا زال منحنيا ويدها
لا تكفان عن العمل)

محفوظ : كل اللى باحلم بيه انى افرد ظهري . . ياريت
تساعدونى . .

(ينام على السرير ، ولا زال على حالته)
(يساعده في فرد جسمه ، شيئاً فشيئاً
يداه تكفان عن العمل الآلى)

محفوظ : الحمد لله .. كنت خائفاً .. احسن ظهري يعقد على
كده .. عن اذنكم .

ماجدة : على فين ؟

محفوظ : حانتهم فرصة الساعة ونص الراحة دول ... وادور على
مطعم تانى .. وقبل ما اشتغل لازم اشوف الحوض ..
أهم شىء الحوض لازم يكون على .. السلام عليكم ...
(يخرج محفوظ ويترك الباب مفتوحاً)

ماجدة : مسكين .. الراجل ده حايتهدل هنا ..
سعيد : يتاهل اللي جابه . ؟

ماجدة : لو استمر كثير فى المطعم ده .. حايتهدل على ميدان السيدة
زينب عدل .

سعيد : (ينحنى مثله مقلداً حركته ثم يستجدي) .. لله
يا اسيادى .

(يضحكان . فى نفس اللحظة تظهر فتاة
شقراء وخلفها سمير .. الفتاة وسمير يدخلان ،
سعيد ينظر لها مندهشاً ، سمير يستولى عليه
الاضطراب .)

سعيد : اهلا يا سمير .. ده أنت اشتغلت بسرعة أهو ...

سمير : أيوه أبيه عصمت ودائى امبارح مطعم ... باعمل
السلطة ..

سعيد : وبعدين ؟

سمير : (يقدم له الفتاة) .. مس بولا

سعيد : (ينحنى لها) You Welcome ...

الفتاة : Thank you

(الفتاة تتجول في الشقة)

سمير : زميلتى فى المطعم ... بتعمل الشوربة ... قصدى كانت

زميلتى فى المطبخ جوه .. وبعدين اشتغلت جرسونة ..

قصدى مش جرسونة .. مساعدة جرسونة .

سعيد : وبعدين ؟

(سعيد هادئا تماما ينظر ببرود لسمير)

(الذى يتزايد ارتباكك)

سمير : احنا عندنا اجازة .. مش اجازة .. قصدى راحة ..

ساعتين .. من الساعة اتنين لاربعة .

سعيد : وبعيد . ؟

سمير : قالت لى حاتروح فين .. ؟ .. قلت لها حاروح ..

سعيد : وبعدين .

سمير : ركبنا سوا .. وبعدين مشيت معايا .. هى ساكنة فى

نفس الشارع .. لما وصلنا لحد هنا عزمت عليها .. عادى

.. اتفضلى ..

سعيد : اتفضلت .. جنسيتها ايه ؟

سمير : نولندية .

ماجدة : طبعا أنت قصدك تعزمها عزومة مراكبية .

سمير : ايوه ..

ماجدة : الناس هنا بتصدق أى حاجة يا سمير .. ما تعزمش اى

حد على اى حاجة الا اذا كنت قاصدها فعلا ..

سمير : حاضر .. معلش .. على العموم اللي يتعلم ما يتعلمش بلاش

(يخرج هو وماجدة ... يعود بعد لحظة)

سعيد : (بهدهوء شديد وبصوت يكاد يقترب من الهس) سمير ...
(يفكر قليلا وكأنه يبحث عما يريد أن يقوله) ... مش
على سريري ...

سمير : (مضطربا) ... ابيه سعيد انت فاهم غلط .. المسألة
مش حا تتعدى انا .. نشرب شاي .. وبعدين ننزل على
المطعم ..

سعيد : انا مش فاهم غلط يا سمير .. انا باتكلم على الشاي ..
برضه مش على سريري .

(ينصرف بهدهوء .. سمر يفتق الباب ،
الفتاة تستلقى على سرير في غرفة النوم ، سمر
في الغرفة الأخرى يجلس على مقعد بجوار
النافذة .. يحدق الى لا شيء عبر زجاج
النافذة باكتئاب شديد .. الفتاة تهمهم باغنية
اوربية .. سمر يكلم نفسه كما لو كان يفكر
بصوت مسموع ... كلماته هامسة بلا اى
انفعال)

سمير : بقى دى وصيتى ليك يا سمير .. ؟ .. ماما ، صدقيني
ما عملتش حاجة حاتكذب على ابوك يا سمير ؟ بقى سمير
ابن الشيخ عبد العزيز يعمل كدة ، الشيطان ضحك على

.. ابليس شاطر .. هو فيه ابليس في لندن . ؟ يا قليل
الحيا .. يا عديم التربية .. يازنديق .. حاتشوى في
نار جهنم .. لا .. حاتوب على طول .. مرة واحدة
واتوب على طول .. ما هو كمان ما ينفعش أبقي تايب
كده على طول من غير ما اغلط .. يا جماعة انا ضعيف ..
والنفس امارة بالسوء .. ما عرفتش اقاوم .. حاجة
بتصرخ جوايا ... بتعوى ... (صوت عواء ذئب من
بعيد) ..

الفتاة : Samir

سمير : Yes darling Just a Second

سمير : يا رب اغفرلى اللى ناوى اعمله .. طبعاً الشيطان موجود
معانا فى الشقة دلوقت .. شيطان انجليزى فاهم شغله
كويس .. مش زى الشيطان المصرى اللى كنت باعرف
اقاومه .. انا لسه صغير .. ما عنديش خبرة وضعيف ..
واتربيت فى بيئة مليانة قيود .. اللى انا شايفه .. ان
الشيطان حايدل مجهود كبير قوى عشان يفلبنى المرة
دى ..

الفتاة : Samir

سمير : وفيه احتمال كبير قوى انه ينجح فى مهمته ويفلبنى ..
الحاجة اللى انا متأكد منها انى بعد ما تفلب .. حاتوب
.. كل شىء مكتوب .. لو مكتوب لى انى اعرف اقاوم
.. حاقاوم .. لو مكتوب ان الشيطان يفلبنى ..
حايفلبنى ..

الفتاة : Samir

سمير : لو مكتوب ان اللى حا يحصل ما يحصلش .. مش حا يحصل
.. ممكن يحصل زلزال دلوقت .. تقوم حرب .. اموت
انا .. تموت هى .. حتى لو ماتت هى .. ابقى اعزم
البت الثانية اللى قاعدة على الكيس .. انا حا قاوم دقيقة
كمان .. عشان ابقى عملت اللى عليه .

(يقف ثم يفمض عينيه ، الفتاة ننهض من
على السرير .. تنهب اليه .. تداعب خده
برقة) .

سمير : لا حصل زلزال . ولا قامت حرب ولا انا مت .. ولا هى
ماتت .. مفيش أمل .

(تبدأ تفك أزرار قميصه .. تبدأ الاضائة
تخفت ، ببطء جدا ..)

سمير : اتغلبت .. على الأقل الواحد لما يتغلب لازم يتمتع بروح
رياضية .. ويعترف بشجاعة .. ان الشيطان شاطر
فعلا .

(تخفت الاضائة .. انظلام)

المشهد الرابع

(عندما يضاء المسرح ، نجد بانوراما كبيرة
تملا فراغ المسرح ومضاءة من الخلف ، على
البانوراما تظهر شرائح ملونة Slides تحدد
المكان الذى يوجد فيه الأبطال ، يراعى أن تكون
رسوم الشرائح بسيطة ، وموحية وقريبة الى
الكاريكاتير مثال ذلك . عندما يجلس سعيد
وماجدة فى صالة المسرح ، نجد فى الخلفية رسم
لمئات المتفرجين ، وهكذا .. انها ليست
مشاهد بغير ما هى لقطات صغيرة .)
(اللقطة - ١ - الشارع - ليل / خارجى)

(عمود كهرباء وجزء من الرصيف ، تحت
العمود صندوق مهملات ، وأشياء ملقاه حوله
فى غير عناية ، اثاث قديم ، كنبه ، بعض المقاعد
سرير ، احمد وعبدو يدخلان ، احمد يتأمل
الأشياء تحت العمود .)

احمد : حد يصدق ان الزبالة هنا فيها سراير ومراتب ورايوهات
وبطاطين ومخدرات وحلل .. لو فيه طريق برى من هنا
لمصر .. كان الواحد لم الحاجات دى كلها وطلع على وكالة
البلح دوغرى ..
عبدو : كنا عملنا ذهب .. تصور البنت سوزان النهارده عملت
تمانية جنيه بقشيش .

(احمد يتأمل السرير ..)

احمد : ايه رايبك فى السرير ده ؟

عبدو : كويس .

احمد : تيجى ناخده .. ؟ ..

- عبدہ : ناخذه ايه ؟ هي شقتنا ؟ احنا مجرد ضيوف .
- أحمد : ناخذه لسعيد .. تبقى مشكلته في الحياة كلها اتحلت .
- عبدہ : فعلا .. ناخذه دلوقت ؟
- أحمد : نستنى شوية .. الشوارع بتبقى فاضية بعد الساعة عشرة .. بس عاوزين ندور له على مرتبة نظيفة ..
- عبدہ : الشارع اللي ورانا ، الزبالة بتاعته احسن من الزبالة بتاع شارعنا .. ندور فيه . حق يا ابني ، لو لقينا شقة فاضية في الزبالة .. تصور .. الراجل الانجليزى قعدت اخدم عليه ساعتين .. بعد ما كل نص اللحمة ، رجعها .. قال ايه ، مش مستوية مادفعش بقشيش طبعا .. واصر ما يدفعش العشرة في الماية خدمه .
- أحمد : الانجليزى فاهم حقوقه كويس .
- عبدہ : مش كده وبس .. بعث شكوى للسياسة من عشرين صفحة .. (لحظة) .. البنت سميرة امبارح طلع لها اتناشر جنيه ، كانت بتخدم على سياح يابانيين .. انت عارف مين بيدفع بقشيش كويس الياباني ، والعربي .
- أحمد : المصرى اجدع منهم .
- عبدہ : بس غلبان يا جدع . على فكرة البنت آمال بيطلع لها بقشيش كويس قوى .
- أحمد : ايه اللي عرفك ؟
- عبدہ : كل يوم بتشتري حاجة . ومن ذلك دايمًا معاها فلوس .
- (وهما يسيران خارجين) .
- أحمد : رقيقة قوى . وأنا باخاف من النوع الرقيق قوى ده ؟
- عبدہ : بالعكس ، دي بنت كويسة قوى ، بتطلع بقشيش حلو .. تصور ، يوم السبت عملت بتاع سبعة جنيه وربيع .
- (يخرجان ، يهر محفوظ ويداه تعملان بلا توقف يخرج) .

(لفتة - ٢٠ - شارع اكسفورد ، : من بعيد يبدو ماربل
آرش ، امام فتارين المحلات ليلي / خارجي) .

(يدخل عصمت وآمال تنتقل بين الفتارين
وهي تحقق فيها باعجاب شديد ان انبهارها
الشديد بالسلع المعروضة ، يكاد يقترب من
الهستريا الخفيفة) .

آمال : كل حاجة .. كل حاجة .. كل حاجة .. كل حاجة
موجودة .. وكثير .. كثير قوى ورخيصة .. ماتالس
على حاجة وماتلاقيهاش .

عصمت : طبعا ، المجتمع هنا حريص انه ياخذ كل فلوسنا ..

آمال : ياخذها ياسيدي . بس نلاقى اللي عاوزينه .. ده انا
بادخل المحل من دول باقى حاجتن ، باكتشف اني
محتاجه كل حاجة جواه . كل حاجة . آلاف البلوفرات
مرمية فوق بعضها زي الروبايكي . لو عندي خمسة
منهم كنت فتحت بوتيك في شارع الشواربي . قماشات
وبلوزات وبلاطى وشرابات ، ونساتين ، وادوات مطبخ
وادوات سفره .. الا الستائر .. كل حاجة اخترعها
الانسان .. وله حاخترعها موجودة . ورخيصة .
هارف يا عصمت . احنا لو بدلنا مجهود شوية .. ممكن
نجيب كل اللي عاوزينه .. ممكن بيتنا في مصر يبقى
جنة .. كل حاجة حانجيبها من هنا .. البيت لازم
مظهره يبقى كويس يا عصمت .. فيه ناس حاتزورنا ..
ناس مهمين . بيوتهم كلها متجهزة من بره .

عصمت : ايوه يا آمال يا حبيبتي .. بس المسألة مش بالبساطة
دي .

(لقطه - ٣ - مطعم ، ليل/داخلي)
(مائدة صغيرة ومقعدان ، يجلسان ، يتناولان
عشاء وهميا) .

آمال : أنا مش باحلم .. أنا واقعية جدا . الطريقة اللي انت
عايش بيها ، غلط ، فاتح بيتك على البحرى .. وقتك
كله بتضيعه فى الرحلات والقراية والفرجة على المسارح
والسينما .. انت بتشتغل ثمان ساعات فى اليوم بس .

عصمت : كفاية قوى على .

آمال : يا عصمت .. احنا لو ماكناش حاشتغل فى السن دى
.. حاشتغل امتى ؟ احنا لو تعبنا سنتين هنا ، ومسكنا
على ايدنا شويه ، ممكن نعيش فى مصر طول عمرنا
مستريحين .

عصمت : ممكن يا آمال نعمل شقة كويسة فى مصر . مش دى
المشكلة . المرتبات هى المشكلة .

آمال : ومين بيعيش بمرتبه يا عصمت .؟ آهى الناس بتتصرف .
عصمت : آه . آهى تتصرف دى اللي انا معترض عليها . وماعرفش
أعملها .

آمال : انت خيالك بيروح لحاجة وحشه ليه . احنا ممكن
نتصرف بطريقة شريفة . ممكن نحول من هنا تمن هربيتين
١٢٨ ... نشغلهم تاكسيات . حايبقى دخلنا أكثر من
تلتماية جنيه فى الشهر ... ده احنا نعيش ملوك .

(يقفان ... لقطه -) - الصورة على
البانوراما فرقة موسيقية .. نستمع لتانجو
هاديء يرقصان .. تتكلم بأقصى مألدها من
همس ورقة) .

آمال : يعنى الليلة دى انت صرفت كام .؟ . يادوب اتعشينا ..
خمشاشر جنيه .. خمشاشر جنيه استرلينى .. ولو
كنت طاواعتك ورحنا سسينما أو مسرح . كان ممكن
يوصلوا لخمسة وعشرين جنيه .

عصمت : انا سعيد جدا الليلة دى . ولما باكون سعيد ، مابافكرش
فى حاجة خالص .. مش عارف انا صارحتك ازاي ..
لحد دلوقت .. مش عارف انا ازاي قلت لك الكلمتين
دول .

آمال : كلمتين ايه ؟

عصمت : باحبك يا آمال .

آمال : سبقتنى .. لو كنت استنيت خمس دقائق .. كنت
حاقولهم لك أنا .. (تهمس وهى تلدوب فى صدره) .
ياحبيبى يا عصمت .

(تخفت الاضاءة قليلا .. يخرجان) .

**** سهر الليل ****

www.liilas.com/vb3

(لفظ - ه - قاعة المسرح ... ليل/داخلي) .

(قاعة مسرح ممثلة بالمتفرجين ، سعيد وماجده جالسان يحدقان باهتمام الى خشبة المسرح ، نستمع لحوار بالانجليزية من مسرحية شكسبيرية ، رد الفعل على وجه سعيد الذى يبدو منفلا باحداث المسرحية الى اقصى حد، يتراجع صوت المسرحية الى الخلفية ثم نستمع الى صوت سعيد مسجلا) .

ص/سعيد: سنتين فى لندن . والليلة دى اول مرة اشوف فيها المسرح الانجليزى . . صحيح انا مش فاهم تلاته اربع الكلام . . لكن حاسس كل كلمة . . حاسس كل حركة . . ياسلام لو كان الواحد فاهم الكلام كله . . كان اتمتع اكثر . . المرة الجاية انشاء الله . . لازم افرا المسرحية قبل ما اتفرج عليها . . انا عندى قاموس حاسنين بيه . ياخسارة . لو كنت باعرف لغة كويس ، كان موقفى اتغير ، كان زمان معايا البكالوريوس دلوقت كان زمانى هنا فى لندن . . مش عشان اقدم السلطة ، عشان اقدم على الدبلوم . . على الماجستير . على الدكتوراه . كنت فى الحالة دى ابقى جدير بواحد زى ماجده . . . مثقفة قوى بنت الابيه . . باين عليها بنت ناس . . انا دخلت المسرح والسينما فى مصر مع بنات كثير . . كنت باحجز آخر كرسيين فى الصالة ، ماكنتش باستنى الفيلم . . كنت باستنى لما الصالة تظلم . . مع ماجده باحس انى طالع ل فوق ، ما عرفش ، انا اللى اتغيرت والا الدنيا هى اللى اتغيرت . كل شىء بقى اجمل من الاول ، باحس ان فيه حاجة بتتولد جوايا . . واحد تانى . . انا باحس انى محترم اكثر من الاول . . ياترى هوه ده الحب نفسى امد ابدى والمس ابدى . . بس ياترى ده مسروح

بيه في مسرح شكسبير .. (يتلفت حوله) لو كان ممنوع
كانوا كتبوا يافطه .. على العموم مافيش داعى .. دى
مجنونة ممكن تعمل اى حاجة .. ياه .. نفسى آخذها
وأطلع أجرى بيها في الشوارع .. على النعمة هو ده
اللى بيسموه الحب ...

(يعلو صوت حوار المسرحية الشكسبيرية ثم
يتراجع الى الخلفية .. نستمع لصوت
ماجده مسجلا) .

ص/ماجده : ما حاولش يحط ايداه على كتفى .. وما حاولش يلمس
ايدى ، واضح انه ولد متربى .. احساسه بافضل حوله
لانسان خايف .. يبص للدنيا على انها غابة كبيرة ..
لذلك بيقتل على نفسه .. بيحاول يمثل دور الأثانى ..
لكن درجة انسانيته عالية . محتاج حد يصحبها جواه
.. سعيد ده من النوع اللى لو حد حطه على اول الطريق
.. ينطلق لوحده .. ويبقى جزء من حركة الدنيا ..
ويبقى راجل . راجل تتمناه اى واحده . مش معنى
كده انى بانصور انه ممكن يبقى جوزى .. الراجل اللى
ياحلم بيه لازم يكون اقوى منى .. اذكى منى .. مثقف
هنى .. اما انا غبية صحيح ممكن الراجل يكون الحاجات
دى كلها .. ومع ذلك ماجبوش او مايجنيش .. سعيد
باحس انه .. انه ابنى .. (لحظة) .. لسه ماجاولش
انه يلمس ايدى .. لو لمس ايدى حاسبها فوراً ..
صحيح أنا مش حاضايق لو لمس ايدى .. بس لازم
اتصرف كده .. والا حايفتكرنى من اياهم .. امسك
ايدى بقى يافى ، المسرحية حاتخلص .. معلش ..
هو جو المسرح مش مهيا لكده .. بكره ندخل سينما ..

(يرتفع صوت حوار المسرحية الشكسبيرية
عاليا ثم يتوقف ، ترتفع عاصفة من التصفيق،
سعيد وماجده يصفقان بحماس ، تخلت
الاضاءة اظلام) .

(لقطة - ٦ - المطعم - ليل/داخلي) .

(يجلسان الى مائدة صغيرة ثم يمثلان انهما

يتناولان عشاء وهميا) .

ماجده : عندك استعداد ترجع الكلية تانى ؟ ..

سعيد : ارجع الكلية .. ؟! .. كلية ايه .. ؟ .. كلية الطب ؟ .

ماجده : أبوه ..

سعيد : ده موضوع انا نسيته يا ماجده .. ارجع ازاي .. ؟ ..

ماجده : ازاي دى تفكر فيها بعدين .. المهم ، عندك استعداد ؟

سعيد : ايدى على كتفك ..

ماجده : المسألة سهلة قوى .. احنا بنحط هدف قدام عينا

.. ونشوف حانوصل له ازاي .. قطعا فيه طريقة .

سعيد : والنبي يا ماجده ماتقليش على المواجه تانى .. انا

احلامي كانت كبيرة قوى .. العيادة .. والعربية الطويلة

.. والفيلة .. والعمارة .. والعزبة .. الصبح عشر

عمليات لوز فى خمسة وعشرين جنيه والضحير عشر

عمليات زائدة دودية فى ثلاثين وبالليل عشرين عملية

بواسير فى اربعين .. يعنى الواحد يطلع له بالف .. الف

ومائتين جنيه فى اليوم .

ماجده : احلامك ماكانتش كبيرة .. احلامك كانت حقيرة ..

ووضيعة .. عشان كده ماعرفتش تكمل .. انا عارفة

من الاول انك وغد .. شريير .

(يمثل انه يفتح زجاجة ثم يصب منها فى كوب

وهي) .

سعيد : أبوكي بيشتغل ايه .. ؟

ماجده : استاذ الفلسفة بجامعة القاهرة .

سعيد : (وكأنه يقرأ في صحيفة) ... حادثة غريبة ... شاب

مصرى يضرب ابنة استاذ جامعى علقه مروعة ثم يقتلها .

ماجده : حاول تعد ايدك على .. انا قعدت سنة وتصر العب

مصارعة يابانى وكاراتيه .. واعرف ادافع عن نفسى

كويس قوى .

سعيد : الظاهر انا قرئت العنوان غلط .. ابنة استاذ جامعى

تضرب شابا مصرى علقه مروعة ..

ماجده : صح كده .

(يضحكان)

سعيد : ماجى .. انا .. انا ..

ماجده : تتحبنى .. وعاوز تخطبنى ...

سعيد : لا .. لا .. لا .. انا كنت عاوز أقول لحضرتك حاجة

تانية .. انت لخطبتينى .. انا كنت كويس قبل ما اشوفك

... كنت ميوط قوى .. اشتغل ، واكل ، واشرب ،

واهيص ، وانام .. مايا فكرش فى حاجة ابدا .. من

ساعة ما شفتك ، بدأت اتعذب .

ماجده : ليه .. ؟

سعيد : بدأت افكر ، ودى مالة جديدة فى حياتى .. بدأت

اشغل عقلى .. بدأت افكر فى بكرة .. بكرة حابقى ايه

.. ؟ .. منك لله يا شيخه ...

ماجده : بينا نرقص ...

(تتفر اللوحة على الخلفية ويحل محلها رسم

لفرقة موسيقية نستمع لتانجو هادى ،

يرقصان) .

سعيد : ماجى ارجوكى .. اخرجى من حياتى .

ماجده : انا لسه دخلتها عشان اخرج منها .. ؟ ..

سعيد : مفيش داعى ييجى اليوم اللى اعترف لك فيه انى

باحبك ، واخطبك ، ونتجوز ... وتبقى مصيبة .

ماجده : عندك حق ياسعيد ، انا مش متصورة ان فيه راجل فى

الدنيا دى يقدر يتحملنى .

سعيد : انا كمان شرس جدا ... لذلك يتحسن بعد عن

بعض .

ماجده : فعلا ... نبتدى من دلوقت ، ممكن تبعد عنى شوية ..

الرقص له اصول .. لازم يكون بينى وبينك على الأقل

عشرين سنتى .

(يضمها اليه اكثر) .

ماجده : كده كويس .. وارجوك .. لازم تحافظ على المسافة دى

بيننا .. مفيش داعى تقرب من بعض اكثر من كده .

سعيد : عندك حق .. عشان كلام الناس كمان .

(تلقى بخدها على كتفه وتعلم) .

ماجده : حاتبقى دكتور فعلا .. وحاتبقى مشهور قوى ...

حايجيلك العيانيين من العالم كله .. وحاتفتح عيادة

فى السيدة زينب ... وحاتعمل الكشف بربع جنيه ...

سعيد : ربع جنيه .. ؟! .. المرة الوحيدة اللي قرئت فيها كتاب
فلسفة .. كان اسمه الفقر حشمة .. بابا هو اللي
مألفه .. أ ..

ماجده : (هامة) .. من خمس سنين فيه واحدة ست شافت
لى الفنجان ..

سعيد : وقالت لك ايه .. أ

ماجده : قالت لى حاتتجوزى واحد مجرم قليل الحيا .. ابعده
عنى شوية ياسعيد ..

(يحتضنها .. اختفاء تدريجى .. اظلام) .

**** سهر الليل ****

www.liilas.com/vb3

المشهد الخامس

(الشقة ، أضواء النيون تتسرب من الشارع
عبر النوافذ ، عبده واحمد يدخلان وهما
يحملان سرير سفرى صغير) .

أحمد : ده ماحدث هنا .. حاسب يابنى .. حاتورنى .

(يفسحان مكان للسرير فى غرفة الصالون
يضعانه فى ركن بجوار الحائط ، أحمد معه
بضعة مجلات وجراند ، يفتح مجلة ، شاب
يدخل ، يختفى داخل الحمام) .

عبده : (يلمح خطابا على المائدة) .. ده فيه جواب هنا هو ..
(يتأمله) ده لعصمت .

أحمد : (مستغرق فى القراءة) من مصر ؟

عبده : أبدا .. مفيش عليه بوسته ولا اختام .. (لقرا) ..

الى أخى الكبير عصمت .. مع تحيات سمير عبد العزيز .

أحمد : آه .. ده الشاب الأسمر بتاع تجارة الأزهر .

عبده : تصور .. ساعتين وأنا واقف قدام الراجل اخدم عليه

.. وفى الآخر بيعت شكوى .. انت جيت روز اليوسف

منين ؟ .. النهارده نزلت أدور على الأهرام .. مالقيتش

جرايد مصرى خالص .. مع ان المنطقة مليانه مصريين .

(شاب يدخل ، يخلع حذاءه ، يرتدى بيجاما
ينام ..) .

أحمد : ما هو عشان المنطقة دي مليانه مصريين .. بتوع الجرايد
ماعادوش بيجيوا جرايد عربى . اتضح انهم بيمسكوا

الجرايد .. يقرؤها ويحطوها تانى ، عشان كده الراجل
اللى فى اكسفور ستريت كاتب يافطة If you want to
read it buy it. اذا كنت عاوز تقرأها اشتريها .

عبده : ده مفترى قوى .. عاوز نشترى جرايدنا كمان ؟
(يحضر علبتى بيرة من المطبخ ، يفتحهما) .

عبده : فت امبارح على المركز الثقافى المصرى . قرئت كل
الجرايد والمجلات بتاع الشهر اللى فات . وكلت فول
وطعمية وبصارة وعدس .. حته من مصر يابنى ..
الجو والاكل والأغانى ، والزعيق ، والتواليات اللى مش
نضيفه ، تحس اناك فى مصر فعلا .. حتى الدبان ..
جابوه منين . ماتعرفش .

احمد : (يقرأ بصوت مرتفع) .. اوقفوا الاساءة لسمعة مصر
فى الخارج .

عبده : لسه بيشتتموتا .. ؟ ..

(الشاب الذى دخل الحمام يخرج منه مرتديا
بيجاما .. ومعه شراب مفسول ، يضعه على
جدار المدفأة ، ينام على الارض ..) .

زى كل صيف .. ناس تقول اوعوا تفروا الطلبة -
وناس تقول سفروهم مش عارف انا ، مين اللى بيسوا
سمعة مصر ، اللى بيجوع وينام فى الجنان ، والا اللى
بينام فى الشيراتون ويخسر عشرة آلاف جنيه فى القمار
فى نص ساعة .

الشاب : (الراقد على الارض وهو يستعد للنوم) .. معاهم حق
ياجماعة .. الشبان هنا بيجوعوا ، وجزء كبير قوى
منهم بينحرف ، الجوع عار .. والضياع عار .. كل دى
حاجات تسوا سمعة مصر فعلا .. بس اللى انا مش

فاهمه .. هي قضية سياسية واجتماعية ؟ والا قضية
جغرافية .. هو يعنى احنا بنجوع هنا بس .. سحرف
هنا بس ... ؟ ... مش محموقين قوى كده ليه على
اللى بيجوعوا هناك .. ؟ .. يعنى مسموح لنا نسا
سمعة مصر بس على شرط ، يكون جوده الحدود . .
(يتشاءب) .. التايمز النهارده بتقول ان وزير مش
عارف ايه ، خد سمرة مش عارف كام ، فى مشروع
مش عارف ايه .. تصبخوا على خير .

(يرتفع شخيره على الفور) .

احمد : بيعاملوا مصر على انها بنت صغيرة . قاصر . خايفين
عليها من كل حاجة .

(الشاب الآخر النائم) .

الشاب : حتى المؤلفين دايمًا يرمزوا لها بواحدة ست .. ماحدث
طلعها راجل .

(يعود للنوم) .

عبده : ولا خايفين عليها ولا حاجة . دى عقد بابنى . غيرة .
حقد . حسد اتخن مافيهم ، يوم ما كان يسافر من
الزقازيق لمصر ، يقول انا اتغربت .. دلوقت احنا بنلف
العالم ، خيالهم طبعا بيصور لهم ان احنا بنهيص هنا
.. مقطعين السمكة وديها .. عاوزين يحرموننا من اللذ
تصور . ساعتين وانا ..

احمد : (مقاطعا وهو يطوى المجلة) .. جيل منيل . لايرحم ..
ولا بسبب رحمة ربنا تنزل .. بالله بينا نجيب المربة .
احسن نكسل .

عبده : بالله .. تصور .. ساعتين وانا واقف اخدم على الراجل

وفي الآخر يبعث شكوى .. (وهما على وشك الخروج)
.. تصور .. الواد محمد يقول لى حاجة مش معقولة .

(دخول عصمت وآمال يقطع الجملة ، يفاجأ

عصمت بوجود السرير) .

عصمت : ايه يا جماعة .. مين اللي جاب السرير ده ؟

عبيده : احنا ..

عصمت : ما احنا كلنا نايمين على الأرض سوا .. احسن مننا
يعنى ؟

احمد : ده مش لينا .. ده لعيد ..

عصمت : غلط .. مش مسموح لنا نحط أى حاجة فى الشقة ،
صاحبة البيت ممكن تطردنا .

عبيده : خلاص نرجعه . بس المحل زمانه قفل .

عصمت : (بسخرية) .. المحل .. ؟ .. لا فاتح .. المحلات اللي
بتبيع الحاجات دى بتفتح طول الليل وطول النهار ..
اتفضلوا ..

احمد : نرجعه ؟

عصمت : اتفضلوا دوروا على مرتبة كويسة .

(عبيده يواصل جملة وهو خارج) .

عبيده : الواد محمد يا أخى يقول لى حاجة مش معقولة .
البت عنايات عملت اربعتاشر جنيه اول امبارح ..
تصدق ؟

احمد : يا جده بطل قر بقى .. بطل نق .

• (يخرجان) •

آمال : لحظة يا عصمت لا البس البيجاما .

عصمت : انفصلى يا حبيبتي .

(تدخل آمال غرفة النوم ، تجذب برافان صغير فتعزل الشقة عن الغرفة ، يسرعى الخطاب انتباه عصمت ، يفتح الخطاب ويقراه ، نستمع لصوت سمير عبد العزيز مسجلا .)

ص/سمير : أخى الكبير عصمت .. تحية طيبة ، اشكرك على ماعدتك الصادقة ، ولكننى قررت ان اشق طريقى فى لندن معتمدا على نفسى ، لقد تعرفت على صديق بولندى مهذب يعمل معى فى المطعم ، وسنستأجر غرفة سويا ، وللعلم هو يجيد اللغة الانجليزية ، ولذلك سأستفيد منه استفادة كبيرة ، عندما استقر فى السكن ، سأخبرك بعنوانى ، مع صادق تحياتى ، اخوك الصغير ، سمير .

• (يطوى الخطاب فى حزن) •

عصمت : صديق ... ه ... ؟ وادى واحد ضاع .

• (ياخذ فى ارتداء بيجامته) •

ص/آمال : (من خلف البرافان) .. يعنى انا مثلا عندى نص الوقت

فاض .. ولذلك حادور على حاجة أشتغلها آخر النهار .

عصمت : على رايبك يا آمال .. الواحد ان ماكاتش يتعب فى السن

دى .. حايتهب امتى .. ؟ .. اسمعى انا قررت اغير

نظام شغلى ، انا باروح المطعم الساعة حداشر ، وباخلص

سبعة ، ممكن آخذ وردية بالليل فى مطعم تانى ..

ص/آمال : وتضيع فترة الصبح ليه ، . . فيه لوكاندات بتقدم
فطار بس . . من سبعة لتعة ، وبتطلب ناس يشتغلوا
ساعتين ونص بس . . تاخذ فترة الصبح في لوكانده من
دول . . حاتخلص قبل ميعاد شغلك بساعة ونص . .
مستريح قوى . . على الأقل حتاخذلك خمستاشر جنيه
في الجمعة زائد البقشيش ، ستين سبعين جنيه في
الشهر ، مش مبلغ قليل . الواحد لو نظم وقته ، ممكن
يشغل خمستاشر ساعة في اليوم ، مستريح ، من غير
ما يحس بارهاق .

(ثلاثة شبان يدخلون ، يخلعون احذيتهم
وينامون على الفسور ، عصمت يقترب من
البرافان يخفض من صوته) .

عصمت : آمال . . الجو هنا بيسمح بالأحلام . . لكن في مصر . .
تفتكرى اهلك حايرحبوا بي . . . تفتكرى انه حايبقى
سهل ان ابن وكيل الامباشى . . بتقدم لبنت وكيل
الوزارة . . . ؟

آمال : بابا ماتولدش وكيل وزارة ، ثم انا حرة في حياتى . .
انا اخترتك لانى بحبك .

عصمت : ودى قضية تانيه ، الغربية بتفقد الانسان جزء من اتزانه ،
وجايز يخلط بين الصداقة والحب ، جايز يخلط بين
الشعور بالاحترام والشعور بالحب آمال . . انا عاوزك
تسالى نفسك كويس . . وارجوكى ؟ ماتسرعيش في
الرد (يقترب من البرافان اكثر ويهمس لها) . . بتحبنى
فعلا . . ؟

(تطل براسها من جانب البرافان) .

آمال : ياسلام يا عصمت .. حتى لما بتحب .. بتحب بعقلك ..
مش بقلبك .

عصمت : الناس كلها ، ليها قلب .. وليها عقل .. الاتنين عندي
في مكان واحد .

(يشير لقلبه ، تخرج من خلف البرافان وقد

ارتدت بيجاما ، تقترب منه وتحديق في عينيه)

آمال : الحب ايه في تصورك ؟

عصمت : الحب مش انا نبص في عينين بعض .. الحب ان احنا
الاتنين نبص لهدف واحد .

آمال : ده انت شاعري كمان .

عصمت : مش انا اللي قلت الكلام ده .. مؤلف فرنساوى .

(تضع يدها على كتفه برقة) .

آمال : انا ما بافهمش في الكلام الكبير قوى ده .. انا متاكدة من

حاجة واحدة بس .. (تمسك بخناقه بشدة) .. مش

حاتفلت من ايدى .. . حاجوزك .. .

عصمت : (يمسك بخناقها هو الآخر) .. صح .. هو ده التعريف

المصرى للحب .. انتى كمان مش حاتفلتى من ايدى ..

حاجوزك)

(تدخل ماجده وسعيد الذى يحول بضعة

كتب ومجلات) .

ماجده : هاى .

سعيد : اللي ما يعرفش يقول خناقه .. .

(آمال تجسنب ماجده وتدخل بها خلف

البرافان) .

عصمت : ايه اللي انت جايه ده .. (يتناول كتابا) .. عطيل ..
سعيد : (باستنكار شديد) .. عطيل ؟ .. مكتوب عطيل ..؟ ..
عطيل دى تقولها فى بلدكم .. دى اوتيللو ، اصل حاتفرج
عليها الجمعة الجاية ، فقلت اقراها .. وده القاموس
اللى جاقراها بيه .. وده كتاب عن تاريخ انجلترا ..
تصدق يا عصمت ان واحد فى سننى ، عايش فى لندن من
ستين ، مايعرفش حاجة خالص عن نضال الشعب
الانجليزى من اجل الديمقراطية .

عصمت : (يتصنع أقصى آيات الدهشة) .. مش معقول ...
سعيد : (يؤكد) .. والله العظيم ؟ حاكذب عليك ؟ اسكت ..
اسكت .. ده اتضح ان الدنيا دى فيها حاجات كتير
قوى الواحد مش عارفها .

عصمت : ياخبر .. وناوى تسكت على نفسك ؟

سعيد : لا .. طبعا ناوى اعرفها .. آدى الكتب .. وآدى
الجرايد والمجلات وآدى القاموس .. لو عرفت كل يوم
خمس كلمات .. يبقى جاعرف مائة وخمسون كلمة فى
الشهر ، الف وتمانمائة فى السنة .. دى مسألة سهلة
قوى يا عصمت .. على فكرة يا عصمت .. انا حابى
كويس قوى .. وجايز .. (يتوقف) ..

عصمت : جايز ايه ؟

سعيد : (وكأنه يحلم) .. جايز اكمل دراستى تانى .. هنا ..
فى لندن ..

عصمت : فيه انقلاب حصل فى عقلك ؟

سعيد : مش انقلاب .. دى ثورة .. ثورة دمرت سعيد القديم
.. وحامل سعيد الجديد ، سعيد الجديد ده بقى
يا سيدى .. حايبقى .. حايبقى .. (يحاول التذكر)
.. استنى لما افكر .. حايبقى جزء من حركة الدنيا .

عصمت : (وقد وصل لسر تحوله) .. آه .. (يقترب من
البرافان) حاسى على الواد يا ماجده .. خفى عليه ..
أحسن تجيبى معاه نتيجة عكسية .. مستشفى الأمراض
العقلية هنا ، غالية جدا ..

ص/ماجده : (من خلف البرافان) انت حاتبلى على .. ماجيتش
جنبه ..

(يدخل عبده واحمد يحملان المرتبة يضعانها
على السرير ، عبده يضع عليها ملاءة فرش
نظيفة . سعيد يراقبهما مندهشا احمد
يقرب منه وينحنى امامه باحترام) .

احمد : سريرك يا استاذ سعيد .

سعيد : (بفرحة مبالغ فيها) .. كمان .. ؟ .. سرير .. ؟ ..
ابنى حيبى حكمتك يارب .. كل الحاجات الحلوة
بتتحقق فى ليلة واحدة .

اخيرا اتقابلنا .. اشكرك يارب ..

(يقترب من السرير ، يلمسه باصابعه ، تخرج
ماجده وآمال من خلف البرافان) .

ماجده : استنى ياسعيد ، .. كله بصحى .. كله بصحى .

(الشبان النائمون يستيقظون) .

ماجده : فيه طقوس لازم تعمل ... (بلهجة خطابية) ... دى
نقله خطيرة فى تاريخك .. وتاريخ حياة الانسانى كلها ..
(تجرى الى المطبخ وتحضر مفرقة يركع امامها
على ركبتيه كما لو كانت ستنصبه فارسا ..
تلمس كتفه بالمفرقة) .

ماجده : راضيا كنت .. قانعا كنت .. واطيا كنت ... مرتفعا
ستكون انهض يا ابن الارض واطلع على السرير ..
(ينهض واقفا .. مجموعة من الشبان تشترك
كلها فى حمل المخذة وتتقدم من السرير فى
احترام شديد ..

مجموعة اخرى تحمل البطانية وتسير خلفه
الجميع يرددون فى نغمات صوت متباينة) .

الجميع : واطيا كنت .. مرتفعا ستكون ..

(مجموعة اخرى ، عندما يقترب من السرير
تحمله فى رفق وتضعه على السرير فى هدوء
شديد .. فى نفس اللحظة التى يلامس فيها
جسده السرير .. يسقط السرير على الارض
.. سعيد ينهض مسرعا .. يكاد يفتك باحمد
وعنده .. يتعدان بسرعة ويفطيان راسيهما
ليتقيا ضرباته المتوقعة ، يتمالك نفسه ..
ويجنب البطانية والمخذة من على السرير ،
يضع المخذة على الارض ، يتفطى بالبطانية ،
ثم يجهش فى البكاء ...

ماجده تسرع اليه ... تنزل ...) .



— السستار —

الفصل الثالث

المشهد الأول

(عندما تفتح الستار ، نجد سعيد يجلس الى المائدة الصغيرة يكتب مذكراته ، احمد وعبد الفطيرى يمدان حقيبتين كبيرتين وهاندباج كبيرة ، بالقرب منها هاندباج اخرى ، من لهجة سعيد ومن أسلوبه في الأداء في الفصل الثالث ، لابد ان يبدو لنا واضحا ، انه قد ازداد رقة وثقة في نفسه) .

سعيد : لندن .. ايرل سكوت .. الاربعاء ٣ اكتوبر سنة ١٩٧٣ .. نهاية العطلة الصيفية ، جو الخريف الكئيب يزحف على لندن ، بدأ الاولاد يعودون الى مصر .. وبقوارى الآن عبده الفطيرى واحمد زغلول يمدان حقائبهما استعدادا للسفر .. هؤلاء الأوغاد الظرفاء سوف يتركون فراغا كبيرا في قلبى ، لا زالت ماجده تراسل الجامعات في كل انجلترا بحثا عن مكان لى في احدى كليات الطب ، هناك احتمال كبير ان يقبلوننى في ويلز .. بعد ان التحق بالجامعة ، سنتزوج ، وبذلك يقضى على املى نهائيا في ان انا على سرير بمفردى .. (يلتفت لهما) .. الواد سمر سافر .. ؟ ..

احمد : في الغالب .. سمر ده حدوتة .. مايشتملش ، وبصرف كويس .. كل يوم مع واحدة شكل .. وكل واحدة فيهم قد امه .

عبيده : الأول بدأ مع الصغيرين .. وبعد كده دخل في الكبار ..
لونه مساعده .. بيدخل أى بار بيكتح ، أى واحد
أبيض قوى زيبى .. مالوش سوق هنا .. آدينى قعدت
في لندن ثلاث شهور .. يعلم الله اننى لم أذق اللحم
الانجليزى ...

سعيد : وطى صوتك يا وغد .. (يشير الى ان هناك احدا ما في
المطبخ ، في نفس اللحظة التى تخرج فيها ماجده من
المطبخ حاملة صينية عليها بعض الأشياء ، عبده الفطائرى
بغير لهجته) .

عبيده : حاكل لحمه منين ... ؟ .. يادوب الفلوس اللى بتطلع
لى تاكلنى جبنة وزيتون .. اخبار البقشيش ايه معاكى
يا آنسة ماجدة ؟ ..

سعيد : عبده يافطائرى ، اننى اتجننت اكيد .. عقلك اتلحس ..
حاجة واحدة بس هى اللى شاغلاك .. البقشيش ..

ماجده : الخطورة لو نزل مصر واشتغل موظف قطاع عام ..

عبيده : أظن بيسموها هناك اكرامية .. ربنا يكرمنا ياست ..
ماجده .

احمد : عن اذنكم .. لسه ورانا لجنة مشتريات .

سعيد : مش كفاية اللى اشتريتوه .. (يحاول رفع الهاندباج
فيفشل في رفعها) .. ايه ده بابنى .. ؟ .. الشنطة
دى فيها مائة كيلو ...

احمد : مش حانتوزن ..

ماجده : شركات الطيران بتوزن كل حاجة .. وانتم حاسافروا
على اير فرانس .
بيدققوا جدا ..

عبده : ابوه ... بس دي مش حاتوزن .

سعيد : عاوز تفهمنى ان ليكم فيها قرايب .. ؟ ..

احمد : لا ... دي اللى حاتوزن .. (يمسك بحقيبة اخرى
شبيهة بها ولكن خفيفة جدا) .. فيها بالطو .. وزنها
بالكثير اثنين كيلو .

عبده : احمد حايقعد بالتفيلة بعيد عن الموظف ... الموظف
حايط التكت يتاع الشركة على الخفيفة .. بعد كده ،
حائيله ، ونحطه على الثقيلة .. والبس البالطو ...

ماجده : ولما الطائرة تقع ..

احمد : يعنى شنطتنا هي اللى حاتوقع الطائرة ...

ماجده : لو فيها ثلاثين واحد عاملين زيكم ، ممكن تقع .

عبده : احنا عملنا تحريات ... عشرة مصريين بس اللى
حاسافروا عليها .

احمد : سلامو عليكم .. اعملوا حساب العنايس .. حانجيب
البيرة معانا .

(بخرجان)

سعيد : حايوخشونى الاوغاد دول ..

(محفوظ بخرج من الحمام وهو يجنف
وجهه بقوطه)

محفوظ : يا سعيد .. دلوقتي السفارة مش عاوزه تديني باسبور
بدال اللي ولع .

سعيد : طبعا .. لازم بيعتوا عصر ويعملوا تحريات .. مش
جائز تكون بعته . .

ماجده : ممكن يدوك ورقة تسافر بيها ، اسمها لييه باسميه ..

محفوظ : انا مش عاوز اسافر .. انا خلاص .. لقيت مطعم
الحوض بتاعه عالي .. وناوي استقر .. المشكلة ان
الاقامة بتاعتي ، حاتنتهى بكرة .. ولازم اروح اجدها

ماجدة : ما تقدرش تجدها من غير باسبور .

محفوظ : فعلا .. ولو قعدت من غير باسبور .. ومن غير اقامة ،
ممكن يتقبض علي ويرحلوني .. (لحظة صمت) ..
ما تعرفش حد تكلمولي يا سعيد ؟ ..

سعيد : اعرف .. الصبح انشاء الله ، اخذك ونطلع هلى قصر
ياكنجهام .. نقابل جلالة الملكة .. حقيقي ست طيبة
وبنت حلال .. ودايما تقول بابى مفتوح لكل الناس ،
بمجرد ما حاتعرف المشكلة دى ، حاتتصل فورا بحزب
المحافظين .. وطبعا حزب المحافظين ، حافظ مشكلة
كل مواطن هنا .. طبعا رئيس الحزب حايتهم .. ويبعت
معانا حد لمامور القسم هنا .. والمأمور يعمل لك اللازم
وانت واقف ..

محفوظ : تفكر رئيس الحزب حايتهم ويبعت معانا حد .. ؟ ..

سعيد : طبعا ..

محفوظ : حد زى مين ؟ ..

سعيد : هسكرى .. مخير .. وزير .. (بهجسوم) .. انت

اتجننت يا راجل انت .. ؟ حد مين اللي عاوزنى اعرفه
واكلمهوك .. انت عاوز تجدد اقامتك فين ؟ .. في
طنطا .. ؟

ماجدة : المشاكل هنا ما بتتحلش بالطريقة اللي بنحل بيها
مشاكلنا في مصر .. الحياة هنا جد يا محفوظ افندى
جد لدرجة القسوة ..

محمفوظ : خلاص .. اجيب شهادة مرضية .. عشان لما يسأونى
أقول لهم كنت عيان .. اظن دى سهلة .

سعيد : لو كان كده معلش .. الشهادة المرضي سهلة جدا ..
مكتب الصحة في الشارع اللي ورانا .. تروح تفتح مخك
مع التمورجى ، يدريك الشهادة ، موضية .. ومعمدة
.. ومختومة ، أربعة وعشرين قيراط ..

محمفوظ : كويس .. يعنى أديله كام .. ؟

سعيد : يادى المصيبة .. يا راجل افهم .. انت بتستعبط والا
ايه ؟ هنا مفيش شهادات مرضية ..

(تتصاعد عصبية سعيد بينما محفوظ بارد
تماما)

محمفوظ : يعنى ايه .. ؟ الناس ما بتعياش هنا .. ؟

ماجدة : مفيش شهادة مرضية الا اذا دخلت المستشفى فعلا .

محمفوظ : خلاص .. ادخل مستشفى ..

سعيد : ادخل ..

محمفوظ : ما تعرفش حد تكلمولى .. بدخلنى مستشفى .. ؟

سعيد : ومن غير ما اكلم حد .. (يدخل المطبخ مسرعا ويصود

ومعه سكنين طويلة) .. حاديلك واحدة في بطنك ، ترقد
في المستشفى ست شهر .. ايه رايبك ؟ ..

ماجدة : (جادة تماما) .. بلاش معدته .. اضربه في حنسه
ما تكونش مهمة .. حته تكون عطلانة ما بتشتغلش ..

سعيد : آه .. فهمت .. عقله .. حاجيب ايد هون .. واديلك
واحدة على نافوخك .

محفوظ : (ساخطا) .. انم بتتريقوا على يا جماعة .. انا في
مشكلة فعلا .. بقي بعد الحياة ما تبتسم لى ، والاقى
مطعم الحوض بتاعه على .. اخسر ده كله ، وارجع
اشتغل مدرس ثانى .. يا اخى ساعدنى يا اخى .. ده
انا كنت استاذك .. قف للمعلم ووفه التيجيلا ..

سعيد : (يقف باحترام) .. حاضر .. وقفت اهو .. خالصين
يا سيدى .

محفوظ : يا اخى .. من علمنى حرفا .. صرت له عبدا .

سعيد : يا محفوظ افندى ، انت متصور انك علمتنى حاجة ؟ ..
خلاص يا سيدى .. انت السيد وانا العبد ، عاوزنى
اهمل لك ايه تانى .. ؟

ماجدة : (تنهى الموقف) .. عشرة الاربع دلوقتى يا محفوظ
افندى .. مفيش داعى تترقد في اول يوم تشتغله ..
وماتنساش بالليل ، حانعمل حفلة صغيرة كده للجماعة
المسافرين .

محفوظ : حاضر ، نازل على طول .. السلام عليكم .

(يخرج)

سعيد : راجل مش معقول ايدا ..

(محفوظ يطل براسه من الباب)

محفوظ : والنبي يا سعيد ..

سعيد : (بضيق شديد) .. افندم .

محفوظ : كنت عاوز أقول لك ايه .. (يتذكر) .. آه .. والنبي
يا سعيد .. على بالليل تكون فكرت لى فى طريقة أدخل
بيها المستشفى .

(يخرج على الفور قبل ان يهجم عليه سعيد)

ماجدة : متصور انك ما دام كنت فى كلية الطب .. يبقى تعرف
تدخله مستشفى .

سعيد : ده مفشوش فى قوى .. المرض الوحيد اللى كنت باعرف
أشخصه .. هو الزكام .

ماجدة : بس ..

سعيد : يعنى .. البرد ومشتقاته ، الزكام ، والانفلونزا، والنزلة
الشعبية ..

(يدخل عصمت ، يرفع يده بالتحية دون ان

يتكلم من الواضح أنه مجهد يتجه مباشرة الى

السري) .

سعيد : وبعدين ..؟

عصمت : وبعدين ايه ..؟

سعيد : وبعدين فى اللى انت بتعمله ده .. آخرته ايه ..؟ الصبح
ساعتين فى لوكاندة تقدم فطار ، وبعدين ثمانية ساعات
فى المطعم .. وبالليل فى لوكاندة مش عارف بتثيل فيها
ايه .. حاستحمل لامتى ..؟

ماجدة : عصمت مش صغير يا سعيد .. هو عارف مصلحته
كويس .

عصمت : مرسى يا ماجدة .. (وقد فرد جسمه على السرير) ..
سعيد ، أرجوك ، صحنى بعد ربع ساعة .

سعيد : (يمسكه من كتفه ويرغمه على الاستيقاظ) .. لا ..
مش حاتنام .. انا عاوز اتكلم معاك .

عصمت : انا تعبان قوى يا سعيد .. ما تبقاش سخييف .. بعدين

سعيد : بعدين امتى ..؟ انا بقى لى شهر مش عارف أقصد
معاك .. شغل ليل ونهار .. ليل ونهار .. عشان
مين ؟ .. عشان الست آمال ؟

ماجدة : (مؤنية) .. سعيد ، أرجوك .. ماتتكمش عليها بالطريقة
دى .. آمال حاتبقى مراته فى يوم من الأيام .

سعيد : انا لى فى عصمت اكثر من مراته .. اكثر من امه .

عصمت : (وقد استند براسه على حديد السرير يحاول مقاومة
النوم) .. مش عشان آمال يا سعيد .. عشانى انا ..
لو تعبت دلوقت حاستريح طول عمرى .

سعيد : معقول الكلام ده ..؟ فيه حد يموت النهاردة ، عشان
يعيش بكره .. ماتتكمى يا ماجدة .

ماجدة : حقيقى يا عصمت .. انت ممكن فى لحظة تدخل مستشفى
وتصرف كل اللى حوشتوه ..

عصمت : انا تعبان فعلا .. وبافكر استريح شويه .. عشان كده
خذت راحة الليلة دى من اللوكاندة .. أرجوكم .. عاوز
انام عشرة دقائق بس .

ماجدة : سيبه ينام يا سعيد .. نام يا عصمت .

(ينام بالفعل)

سعيد : حاجة واحدة عاوزك تعرفها قبل ما تنام .. احنا حانتجوز ..

(يقوم من النوم وهو يهز راسه بشدة لكي يتنبه)

عصمت : حانتجوزوا ؟.

ماجدة : ايوه ..

عصمت : حانتجوزوا مين ..؟

سعيد : حانتجوز بعض ..

ماجدة : بابا وماما وافقوا .. وحاييجوا هنا يقعدوا معنا اسبوع

سعيد : حانكتب الكتاب في السفارة .. ماذون اول السفارة هو اللي حايكتبه ..

عصمت : (شدة الاجهاد يجعله يتكلم همسا) .. الف مبروك يا جماعة .. لو كنت فايق كنت قمت حضنتكم وبستكم

ماجدة : عقبالك يا عصمت ..

عصمت : متشكر .. (ينام) ..

ماجدة : حاتنزل الساعة كام ؟.

عصمت : عشرة ..

ماجدة : هي عشرة دلوقتي ..

(ينهض بصعوبة)

عصمت : كويس .. اهو عيني غفلت شوية .

(يقوم وهو يترنح ، يدخل المطبخ خطأ ..
يخرج منه ثم يدخل الحمام)

سعيد : قلبي مقبوض يا ماجدة .. حاتحصل حاجة ..

ماجدة : حايحصل كل خير .. ما تحطش في بالك .
(يخرج عصمت من الحمام وهو يجفف وجهه)

سعيد : ما دام عندك راحة الليلة دي .. ما تنساش تيجي بدرى
.. حانعمل احتفال صغير ..

ماجدة : أحمد وعبدہ ومعاهم مجموعة حايسافروا الصبح ..

عصمت : حاضر .. ولو ان آمال عاوزة تخرج معايا تشتري شوية
حاجات ..

سعيد : آمال دي نشطة جدا .. على العموم خلصوا مشايركم
وتعالى ..

(عصمت في طريقه للباب ، يسير مهتزا ،
يكاد يصطدم بسير الذي يدخل زائغ
النظرات ، مكتئب كما لو كان يخفى أمرا
مخجلا)

ماجدة : أهلا يا سير .. شبعت رقص والا لسه ؟ ..

سعيد : أهلا بالدون جوان ، فالنتينو .. قاهر الحسنات ..

سير : (ينظر له في خجل ثم يوجه حديثه لعصمت) .. انا
عاوزك ..

عصمت : خير ..؟

سير : حاجة خاصة بي .. مشكلة .

عصمت : (ينظر في ساعته) .. سمر انا نازل دلوقت .. ممكن اشوفك بالليل ؟

سمر : (يقاوم الألم وهو يجلس) .. انا تعبان .. تعبان قوى .
عصمت : مالك ؟

(ينظر لسعيد وماجدة وكأنه يخجل من الإقضاء أمامهما بما يعانيه)

عصمت : (ينظر في ساعته) .. ماقدرش أتأخر عن كده .. آمال بتستناني في الشارع .. والنبي يا سعيد تشوف سمر ماله .. (في طريقه للخارج) .. أشوفك بالليل يا سمر (يخرج)

سعيد : مالك يا سمر ؟

سمر : انا عيان .

سعيد : عندك إيه .. ؟

(يصمت لحظة وهو ينقل نظراته بخجل بين سعيد وماجدة ثم يطرق برأسه ولا يجيب)

ماجدة : واضح أنك مش عاوز تتكلم قدامي ، مكسوف .. كان لازم تعرف يا سمر من الأول ان سلوكك لازم ينتهي بانك تصاب بمرض من النوع ده .

سعيد : من امتي الحكاية دي .. ؟

سمر : من شهر تقريبا ..

سعيد : شهر ؟! .. ومارحتش لدكتور ؟

سمير : لا . . . تصورت انه حايروح لواحده . . . انا سمعت عن
الأمراض دى . . . لكن . . . لكن .

ماجدة : لكن ما صورتش انك ممكن تصاب بيه .

سمير : أيوه . . . حاولت اقابل عصمت . . . كان دايمًا مشغول .

سعيد : وماجيتلش ليه . . . ؟

سمير : كنت متلخبط ، وفي حالة نفسية سيئة جدا . . . كمان
اتسرفت . . . كل فلوسى . . . وحاجات كثير كنت شاربها
. . . كلها اتسرفت من الأودة .

ماجدة : كنت ساكن مع مين . . . ؟

سمير : كنت ساكن لوحدى . . . قمت الصبح من النوم مالتقيتهاش

سعيد : اختفت . . . عفاريت خدتها . . . لندن مليانة عفاريت
اليومين دول . . . بتصيب الناس بأمراض وبتسرقها .

(لحظة صمت)

سعيد : وانت مروح بالليل . . . ماروحتش بايدك فاضية . . . فت
على بار من أياهم . . . وطلعت ومعك واحدة . . . الصبح
سابتك نايم . . . وخذت كل حاجة . . . ده اللي حصل .
مش كده . . . ؟

(لا يجيب ولكنه يومىء برأسه موافقا)

ماجدة : مش وقته يا سعيد . . . المهم دلوقت انه لازم يتعالج فوراً

(سمر وقد فشسل في منع دموعه ، يبكى
بصوت خافت)

سعيد : (يهدئه) . . . اهدأ يا سمر . . . ما تتخضش . . . الحاجات

دى بتتعالج بسهولة .. بس ما كانش يجب تسينب
نفسك لحد ما تحصل لك مضاعفات .

سهر : (من خلال الدموع والألم) .. انا تعبنا قوى .. انا
عارف ان ربنا بيعاقبنى على اللي عملته ..

سعيد : حاتقوم معايا دلوقت نروح لأقرب مستشفى .

(واضح انه غير قادر على الوقوف)

سهر : متهيألى .. متهيألى .. مش حاقدر أمشى ..

سعيد : حاول .. حاتتسند على لحد اقرب تاكسى ..

(يساعده على الوقوف ، يستند اليه ،

يسير به فى اتجاه الباب ، يقف لحظة ، يلتفت
لماجدة)

سعيد : ماجى .. فيه احتمال يحجزوه فى المستشفى .. حاقعد

معاه لحد ما اطمئن عليه .. اعتذرى لهم فى المطعم ..
مش حاعرف أروح النهاردة ..

(اختفاء تدريجى للاضائة)

**** سهر الليل ****

www.liilas.com/vb3

المشهد الثانى

(اضاءة الشارع تاتى عبر النوافذ ، ظهور
تدرىجى للاضاءة ، سعيد يعلق بعض الزينات،
وينسق بعض الزهور ، ماجدة ترص عددا من
الأطباق على المائدة)

سعيد : الثنين دكاترة قعدوا يكشفوا عليه ييجى ساعتين ...
وراحوا حاجزينه ... وبدأوا يدوله علاج ...

ماجدة : قطعا حصل له مضاعفات سيئة .

سعيد : الدكاترة اللى كشفوا عليه ، اتضح انهم مصريين ...
المستشفى فيه عشرة دكاترة .. منهم ثمانية مصريين
.. .. الواد سمير اتخض لما سمعهم بيتكلموا عربى ..
اتهياله انهم حايروحوا يقولوا لابوه .

(جرس الباب ، ماجدة تفتح الباب)

ماجدة : اهلا ... ده العصابة كلها وصلت ..

(يدخل عبده الفطيرى حاملا كمية كبيرة
من علب البيرة .. المجموعة كلها تدخل خلفه
وقد حملت كمية كبيرة من المشتريات ..
.. يخلعون البلاطى والبلوفرات) .

عبده : تلج بره .. تلج .. موت .. اللى يقعد فى الشارع اكر
من عشر دقائق يموت من البرد .. درجة الحرارة تيجى
ماية تحت الصفر ... حاجة غريبة .. انجلترا دى
يا أخى .. عالم متحضرين قوى .. ومع ذلك الدنيا
عندهم برد جدا ..

... : ده ايه البرد ده يا أخى ..

... : نفسى فى شوية شمس من بتوع مصر ..

... : بكرة تشبع يا خويا ..

... : الحمد لله أن الشقة مكيفة ..

... : هو فيه حاجة مش مكيفة ... ؟ ..

... : الشوارع ..

... : عاوزهم يكيّفوا الشوارع كمان ..

... : فيه كبايات كفاية .. ؟ ..

... : على ايه كبايات ... حاشرب البيرة من العلب على طول .

... : الواد ابراهيم ده معلم .. فلوسه جاب بها اكسسوار عربيات .

... : حد يبجى يساعدى .. عاوزين نشوى لحمه .

... : الطرشى اللي كان هنا خلص .. ؟ ..

(بعضهم يفتح علدا من الريكوردات ،
فنستمع لبعض الأغاني التي تتحدث كلها عن
مصر ..)

ماجدة : اسمعوا يا جماعة ... وطو الريكوردات دى .. كله
يجمع هنا ...

(صوت الأغاني فى الخلفية)

ماجده : فيه مفاجأة كنت مأجلاها لما يبجى عصمت وآمال ...

بس جايز يتاخروا . . ولذلك حاعلنها دلوقت . .

(تخرج مطروفا صغيرا ثم تعلى كرسيها)

ماجدة : لما تيعتوا جوابات انشاء الله . . ابقوا ابعتوها باسم
الدكتور سعيد ابو الحمائل . . جامعة لندن موافقة انها
تقبله في اعدادى طب . . وباعته تطلب شهادة بالمدة اللي
قعدها في كلية الطب جامعة القاهرة .

(الجميع يهجمون عليه ، يقفزون عليه
يقبلونه وهم يطلقون صيحات الفرح بينما هو
يستغيث ، يخلص نفسه منهم ويذهب الى
ماجدة ينزلها من فوق الكرسي ثم يقبلها في
جيبها)

سعيد : ماجدة . . مش عارف أقول لك ايه . . حاقول لك حاجة
احدة . . متشكر . .

عبد : يبقى دلوقتي نشرب في صحة سعيد وماجدة . .

(يرفعون علب البيرة الى افواههم ، في نفس
اللحظة يدخل محفوظ فيتوقفون عن الشرب ،
محموظ جسمه انحنى لاعلى ويداه تعملان
بلا توقف وكأنه لا زال مستمرا في غسل الأطباق
امام حوض عال)

محموظ : سبعة آلاف طبق من الصبح احد دلوقت . . على العموم
أرحم من الأول على الأقل الواحد يمشى في انجلترا وراسه
مرفوعة لفوق .

(عبد يساعده في أن يعود بجسمه وذراعه
لحالتهم الطبيعية)

محفوظ : بتعملوا ايه .. ؟ .. بتحتفلوا بايه ؟ .. لكم عين تحتفلوا ؟ .. محفوظ الكفراوى حابنترد بكره الصبح من لندن .. معاندكوش ضمير ؟ .. فكروا لى فى طريقة ادخل بيها مستشفى ..

(الجميع يصمتون)

سعيد : انت حاتزن تانى ؟ .. طب اسمع .. (وقد لعت فى رأسه فكرة) .. تنفذ اللى اقولك عليه ..
محفوظ : انفذ ... حانعمل ايه .. ؟ ..

سعيد : مالكش دعوة .. حادخلك مستشفى .. ماترجعش لعيط .. ؟ ..
محفوظ : لا ..

سعيد : كله ينفذ اللى حاقول عليه .. كل واحد يلبس اتقل حاجة عنده ..

(يرتدون الجاكات والبلاطى والبلوفرات بسرعة)

سعيد : تعالى أقف هنا .

(يقف به فى منتصف الحجرة تماما !)

سعيد : اقلع البالطو والجاكتة والقميص .. ولو لابس فائلة صوف اقلعها ..

(محفوظ ينفذ اوامر سعيد)

سعيد : عاوز اربعة جامدين .. (اربعة شبان يقتربون منه) .. امسكوه جامد .. أوعوا يتحرك من مكانه ..
محفوظ : حانعمل ايه يا مجنون .. ؟ ..

سعيد : مالکش دعوة .. عبده .. فيه علبة في المطبخ فيها شطة ..
وفيه قالب حلاوة طحينية .. هاتهم ..

(عبد يختفى داخل المطبخ ، يعود ومعه

علبة الومنيوم هائلة الحجم وقالب حلاوة
طحينية)

محفوظ : كل دي شطة .. ؟

(عبده يخرج من داخل العلبة الكبيرة ..

علبة صغيرة)

سعيد : جاهزين .. ؟ ..

الجميع : جاهزين ..

سعيد : عبده يافطيري .. حاقول واحد اتنين تلاتة .. تروح
مأكله الحلاوة الطحينية والشطة .. عارف ازاي ؟

عبده : عارف .. شوية شطة ووراهم حنة حلاوة ووراهم بق
بيرة ..

سعيد : برافو .. واحد .. اتنين .. تلاتة .

(دون أن يتنبه أحد لما سيفعله ، يفتح زجاج

النوافذ على مصراعيه .. تكاد نستمع لزمجرة

الريح البارد داخلة الفرفة ، يعلو صراخ محفوظ

بين ضحكات الجميع ، عبده الفطيري مستمر

في لهجته)

سعيد : امسكوه جامد .. أوعوا يفلت منكم .. بسرعة يا عبده ..

أحسن يموت في أيدينا ..

محفوظ : (يصرخ) .. حاموت .. حاموت ..

ماجدة : غلط يا سعيد .. غلط اللي انت بتعمله ده .

(تجرى للنوافذ تفلقها ، محفوظ يتاوه
بشدة ، مجموعة من الشبان تحمله وتضعه على
سرير وهو يتاوه ، تخفيه بالبرافان)

سعيد : ما تخافيش عليه .. حايستحمل للصبح .. والصبح
انشاء الله حائنقله على المستشفى .. حابلاقوه عيان
بمائة حاجة .. نزلة شعبية على التهاب رئوى ، على التهاب
فى القولون ، وجايز الشطة تعمل له قرحة فى المعدة يبقى
خير .. يعنى شوية حاجات تحير الدكاترة قولى جمعيتين
على ما نتصرف .

(يبدو على ماجدة انها مستاءة لماجدة)

عبده : (يرفع علبة البيرة) .. يا الله يا جماعة .. فى صحة سعيد
وماجدة ..

(يرفعون العلب ، احمد يدخل ، مضطربا)

سعيد : اهلا يا احمد .. خد علبة بيرة .

عبده : مالك .. ؟ ..

احمد : عصمت اتقبض عليه ..

ماجدة : ايه .. ؟

احمد : (يرفع صوته قليلا) عصمت اتقبض عليه ..

سعيد : ازاي .. وامتى .. وفين ؟

احمد : انا كنت فى اكسفورد ستريت باستري حاجة من محل
هناك .. خرجت لقيت زحمة قدام الباب .. وبوليس
... وسمعت ناس بتقول مصرى .. اتضع انه واحد

سارق حاجة من المحل .. بصيت كده .. يمكن يكون
حد أعرفه .. لقيته عصمت ... وخذوه في عربية
ومشيوا ..

ماجدة : آمال كانت معاه .. ؟

أحمد : ما شفتهاش ... كانوا ماسكينه لوحده ..

سعيد : ما تعرفش خدوه على فين . ؟ ..

أحمد : لا ..

(تدخل آمال ومعها بعض المشتريات ،

منكسة الرأس) .

سعيد : آمال ... انت كنت مع عصمت .. ؟ ..

آمال : ايوه ..

سعيد : حقيقى .. (لحظة .. يبحث عن كلمة) .. حقيقى خد

حاجة من المحل وما دفعش تمناها ؟ ..

آمال : ايوه ..

سعيد : يعنى عصمت حرامى .. يسرق من المحلات ... لقوا

معاه ايه .. ؟ ..

آمال : ما خدتش بالى ..

سعيد : افتكرى ...

آمال : اظن شراب ..

سعيد : شراب .. ؟ .. حريمى والا رجالى .. ؟ ..

آمال : مش فاكرة ...

سعيد : لا فاكراه يا آمال .. فاكراه كويس قوى .. الشراب اللي

سرقه عصمت .. حريمى والا رجالى .. ؟

ماجدة : حريمى ..

سعيد : الست آمال عاوزانا نصدق ان عصمت سرق شراب
حريمى ثمنه ثلاثين بنس .. هو اللي خد الشراب
يا آمال .. ؟ ..

(لا تجيب)

سعيد : ردى على من فضلك ... عصمت هو اللي خد
الشراب .. ؟ ..

آمال : (باندفاع) وانا اعمل له ايه .. هو اللي تسرع واعترف
انه خده .. الشراب كان معايا انا .. كان فى وسط
الحاجات اللي اشتريتها ... بس انا كنت حانكر ..

سعيد : كنتى حانكرى .. ؟ ..

آمال : ايوه .. مفيش دليل على انى سرقته .. كنت حاقول ان
اى حد حطهولى فى الكيس .. لكن هو خدته الشهامة
وتسرع ...

سعيد : تسرع .. ؟ .. آتسة آمال ، عصمت ما تسرعش فى دى
بس .. عصمت تسرع لما حب واحدة زيك ..

(يخطف جاكت ويندفع خارجا ، تبعه

المجموعة)

ماجدة : (تقترب منها بهدوء وتكلمها بتؤدة) .. وناوية تعملى
ايه .. ؟ ..

آمال : حاعمل ايه ؟ ..

- ماجدة : تروحي تعترفي بالحقيقة .. عصمت اثبت انه شهم .
 ونبيل ، ويحبك فعلا .. لازم تثبتى انك مش اقل منه .
- آمال : مش حايجصل له حاجة .. ممكن القاضى يبراه .. لان
 دى اول مرة ... اقصى حاجة ، برحلوه برة انجلترا ...
 فى الحالة دى حانسافر احنا الاثنين ...
- ماجدة : ده انت دارسة الموضوع كويس قوى .. غاب عنك ازاي
 ان المحلات كلها مليانة كاميرات .. ؟ .. ومادام المسألة
 تحتل البراءة او الترحيل ... ما تروحي تعترفي ..
 على الأقل عشان تثبتى انك بتحبيه ...
- آمال : ماجى الموقف بيختلف بالنسبة لى .. لو خرجت من
 انجلترا مترحلة ، السفارة حاتعرف ، ودى حاجة ممكن
 تهز مركز بابا ... فيه تعديل وزارى حايجصل ...
 وفيه احتمال كبير قوى انه ..

(تتوقف عن تكلمة الجملة)

- ماجدة : (منفعلة ولكنها متمسكة بهدونها) .. آمال .. انا عمري
 ما خجلت من حاجة عملتها ... لكن ، انا دلوقت خجلانة
 جدا لانى عرفتك فى يوم من الايام ... انت قدامك فرصة
 واحدة عشان تصلحى اللى عملتية ... ، .. تعيشى طول
 عمرك خدامة لعصمت بكده بس ، ممكن تكفرى عن جزء
 من اللى عملتية .. (تفشل فى التمسك بهدونها ، تنفعل
 فى عصبية) .. كمان فيه حاجة عاوزة أقولها لك من
 ست سنين .. بطللى كلام عن عيلتكم .. وعن ابوكى ..
 (تكاد تنفجر باكية) يلعن روح ابوكى .
 (تخطف معطفها وتخرج)
 (تمر لحظة ، آمال ترفع رأسها الى اعلى
 وهى تبكى)

- آمال : يا رب تطلع براءة يا عصمت ...
 (اختفاء تدريجى)

المشهد الثالث

(زنزانة ، نافذة صغيرة في أعلى الزنزانة
مغطاة بقضبان حديدية ، سرير بتوردين ،
عصمت ينام على السرير الأسفل ، صوت وقع
الأقدام ثقيلة ، ثم صوت باب حديدى ضخم
يفتح محدثا صريحا .. الصوت يوافق عصمت ..
يعتدل جالسا على سريره ، يدخل سعيد)

عصمت : أهلا يا سعيد ..

سعيد : أخبارك إيه .. آ .

عصمت : نمت .. نمت نوم عميق ... اكتشفت ان أهذا مكان في
العالم هو الزنزانة .. كويس انهم رضيووا بدخلك .
سعيد : قلت لهم انا مندوب لجنة حقوق الانسان في الأمم
المتحدة . (لحظة) .. لجنة حقوق الانسان الحرامى .

(يضحكان)

سعيد : انا زعلان منك جدا .. بقى ياراجل .. ده انت زميلى
من عشرين سنة .. تخبى على المدة دى كلها انك
حرامى ..

(عصمت يضحك)

عصمت : (بدهشة مبالغ فيها) .. مش معقول .. حقيقى
ما تعرفش .

سعيد : والله العظيم ما اعرف .. صحيح انا كنت شاكك في الحكاية
دى .. لكن مش متأكد .. بس حقيقى انت حرامى
خيبان قوى .. تسرق شراب ثمنه تلالين بنس ..
وبعدين اول ما يمسكوك ، تعترف ..

عصمت : علوزنى اكذب .. السرقة وأمرها معروف .. حادخل
فيها السجن .. لكن الكذب ممكن ادخل فيه جهنم ..

سعيد : السجن خلى دمك خفيف جدا .. (جادا تماما) ..
عصمت ، .. مفيش وقت .. انت اتحدد لك جلسة بكرة
الصبح .. الأقوال اللى انت قلتها قدام البوليس ..
لازم تغيرها قدام القاضى .. لازم تقول الحقيقة ..

عصمت : الحقيقة انى خدت الشراب ..

سعيد : الحقيقة ان آمال هى اللى خدت الشراب ... آمال
اعترفت بكده قدمنا كلنا .. الحقيقة ان حضرتك لعبت
دور الفارس الشهم النبيل .. وخلصتها هى ، وورطت
نفسك ..

عصمت : So what

سعيد : تعترف بالحقيقة .. ولو ما عترفتش بالحقيقة ..
حاروح المحكمة ومعايا تلاتين واحد يشهدوا انها اعترفت
قدامنا ، انك ما خدتش حاجة .

عصمت : سعيد ارجوك ، كان لازم اعمل كده ، انا اتصرفت صح ..
طول عمرى اتعلمت انى اتصرف صح بغض النظر عن
النتائج .

سعيد : النتيجة المرة دى ممكن تكون مغزعة ... ممكن تتسجن ..
عصمت : ما اعتقدش ان انجلترا عندها استعداد تسجن واحد
لمجرد انه سرق شراب ..

سعيد : والله انا ما عرفش القضاء الانجليزى بي فكر ازاي .. انا
باحط قدامك فرض .. مش جايز يسجنوك !

عصمت : احتمال .

سعيد : فى الحالة دى حاتعمل ايه .. ؟

عصمت : حاتسجن طبعا .. وقطعا حاتبقى تجربة ظريفة ...
مش اى واحد تتاح له فرصة انه يدخل سجن
انجليزى ..

سعيد : (بغضب) .. ارجوك يا عصمت .. بطل خيال ...
بطل رومانسية .. خليك واقعى دقيقة واحدة .

عصمت : واقعى يعنى ايه .. ؟ .. ادخل الانسانة اللى انا باحبها
السجن ، عشان اخرج انا ؟ .. واقعية دى والا ندالة .. ؟

سعيد : (بانفعال شديد) .. الانسانة اللى انت بتحبها لصة ..
دى حفيقة مش عاورة فلسفة .. انت ايه ؟ .

الحب عمى عينك خلاص .. آمال لصة .. وطول
الصيف بتسرق من المحلات .. حاتجوز لصة .. ؟
حياتك حاتنجح مع لصة .. ؟ انت لازم تقطع علاقتك
بيها فورا .

عصمت : (هادىء تماما) .. لا يا سعيد .. آمال انانة طبيعية
جدا .. اللى حصل ده مالوش صلة بالاخلاق انا معاك ..
اللى حصل من وجهة نظر القانون ، يعتبر حادثة سرقة ..
الحقيقة مش كده بالظبط .. من سنين طويلة والناس
والناس بتحلم بالجاچات اللى بيتيجى من بره .. حاجات
هايفة فعلا .. لكن الحرمان منها .. والكلام عنها دايم ..
وصعوبة الحصول عليها بدون سبب مفهوم .. يعمل
نوع من الصرع .. نوع من المرض النفسى .. ممكن
واحدة تبيع نفسها عشان بلوزة .. عشان فستان ..
لما بيعجوا هنا ويدخلوا المحلات .

سعيد : بيتجننوا ..

عصمت : فعلا ..

سعيد : يا عزيزى الفيلسوف الرومانسى .. السرقة من المحلات
مسألة شائعة فى العالم كله .. مش مسألة خاصة بينا
.. لصوصية عادية .. سرقة .. زى اللى بيرفوا
الشقق .. الحالة المرضية نادرة جدا .. ثم انت عاوز
تقنعنى ان آمال مجنونة .. ؟ خلاص .. موافق ..
حاتتجوز واحدة مجنونة .. ؟ .. مش هو ده المرض
اللى ييسموه كليتومانيا ..

عصمت : بالنسبة لآمال ، مش كليتومانيا .. ده نوع من الانهيار
العصبى .. الانهيار فى مواجهة السلعة .. تقدر نسميه
الانهيار العصبى السلمى .. حرمان طويل وفجأة ..

سعيد : عاوز تفهمنى ان بنت وكيل الوزارة كانت عايشة فى حرمان
طويل .. ؟

عصمت : الاحساس بالحرمان فى الطبقة دى يبقى اكثر من الظلمة
اللى زينا .. لاهى فوق قوى عشان تحصل على كل
حاجة .. ولا هى تحت قوى بحيث ترضى بالحرمان ..
المسألة نسبية .. نجاة بتلاقى نفسها فى وسط الآلى
السلع من كل الأشكال والألوان .. بتنهال .. لكن انا
مؤمن اننا لما نتجوز انشاء الله .. حايكون عندنا بيت
متماسك ، وحاتقدم للمجتمع اولاد كويسين .. حاتبقى
مسئوليتى انا ، اتى ازرع فى بيتى القيم الحقيقية ، واعتقد
انى قادر على كده .. (لحظة) .. سعيد .. انا عاوز
أنزل مصر .. مهما فعلت هنا .. ومهما حققت من نجاح
.. فى النهاية حاتبقى مواطن درجة ثانية .. انا تمبت ..
انا تمبت من الضباب ومن المطر ..

سعيد : (يكاد يتوسل) .. عصمت .. أرجوك .. انا محتاجك

معاً هنا .. أنا حادخل كلية الطب هنا ..

عصمت : حقيقى .. الف مبروك .. سعيد انت مش محتاج حد
جانبك .. انت معاك ماجدة ..

(صوت مفتاح فى الباب .. ثم صرير الباب
الحديدى)

سعيد : (بسرعة) .. عصمت .. المجموعة كلها اجلت سفرها
هناك .. عصمت .. اذا كنت بتحبنى صحيح ..
ارجوك .. قول الحقيقة بكرة ..

عصمت : (لحظة .. ثم ينظر له بابتسامة) ، وحشتنى الشمس
يا سعيد .. نفسى اتمشى على النيل فى اكتوبر وانا لابس
قميص بكم نصير ...

(سعيد يطرق براسه الى الارض ، يمسح
نفسه من البكاء ويستدير خارجا)

- (السلام) -

**** سهر الليل ****

www.liilas.com/vb3

المشهد الأخير

(الشقة ، المجموعة كلها موجودة ما عدا
سمير ومحفوظ ، يجلسون في قلق صامتين ،
ماجدة تحديق من خلال النافذة ، صوت الأمطار
.. آمال وقد جلست على السرير وبجوارها
حقائبها وأشياءها ، تنظر للأرض)

ماجدة : (بعصبية) .. ضلعة .. الضباب كثيف جدا النهارده
.. في عز الظهر ومشر شايفين حاجة في الشارع ..

(جرس الباب ، ماجدة تهرع لتفتح يدخل
سعيد ، يخلع معطفه الواقى من المطر ، ماجدة
تأخذ الباطون وتنظر قطرات الماء من فوقه)

سعيد : مالحقتش الجلسة .. تهت .. ماعرفتش المبني بسهولة
.. لما وصلت المحكمة .. كانوا خلصوا .. وخدوه ..
ماعرفتش حكموا عليه بابه .. الباسبور بتاعه هنا ..
(يلتفت لهم) .. البوليس مايمتش يطلب الباسبور .. !

(ماجدة تشير برأسها بالنفى ، يتحرك في
الشقة بقلق .. بين الحين والآخر ينظر من
خلال النافذة)

سعيد : لو كانوا حابر حلوه ، أكيد حد حايجي يطلب الباسبور ..
او جايز يبجي ياخده بنفسه .. (لحظة صمت ..
فجأة) .. في ابتدائي ، كان دايمما يطلع علينا الأول ..
كان زميلي .. كان قاعد في أول دكة .. وأنا كنت قاعد

فى الآخر .. (يحاول ان يبدو مرحا ، يقاوم لكى لا ينفجر
 فى البكاء) .. انا فاكر اول كلام قالهولى .. قال لى
 ماتيجى تقعد جانبى .. ولمى لى سيجارة يا ماجدة ..
 من يومها واحنا مع بعض .. عشرين سنة .. (يضحك)
 مش فاكرين سرق حنفيه من دورة الماية .. كنا فى
 ثانية ابتدائى .. وعصمت شافه .. مارضيش يفتن ..
 مدرس الالعاب مده ، وقعد يضرب فيه من الحصة الاولى
 لحد الحصة السابعة .. ماتكلمش .. (ينظر من خلال
 النافذة .. يصمت لحظة .. يلتفت لهم) .. آه ..
 افكرت .. انا .. انا اللى خدت الحنفيه وبعثتها بخمسة
 تمريرة عشان ادخل سينما ايزيس .. (ينظر لساعته فى
 عصبية) مش معقول لحد دلوقتى البوليس ما يطلبش
 الباسبور .. (يعرض طول المشهد الا يقع نظره على
 آمال وكانها غير موجودة) .. انا فشلت فى كلية الطب
 عشان ماكانش معايا .. يعنى .. مجموعى كان كبير
 وكان نفسى اطلع دكتور .. هو كمان مجموعه كان يدخله
 الطب .. رفض .. قال لى انا مش متصور يا سعيد
 اتى افتح بطن حد بمشروط .. كان ابن حلال قوى ..
 بس ساعات كان يعمل حاجات تفرس .. يا سلام
 يا ولاد .. يا سلام يا عصمت .. حد كان يصدق .. حد
 كان يصدق اتى حافندك بالطريقة دى .. بالطريقة
 القدرة دى .. (هادنا تماما) .. فى ثانوى لعبنا كورة

.. كنا متفاهمين قوى .. (يلصق جبهته بزجاج النافذة
..) كان يلعب جانبي .. كان دائما جانبي .. (يفشل
اخيرا في التماسك فيجهدش في البكاء وهو يضرب زجاج
النافذة بعنف) .. كان دائما جانبي .. دائما جانبي
دايما جانبي .. دايما جانبي .. دايما جانبي .. دايما
جانبي .. دايما جانبي .. دايما جانبي ..

(ماجدة والمجموعة تلتقي به ، يهذونونه
ويجلسونه على مقعد)

ماجدة : سعيد .. انت اتجشنت .. هو عصمت مات .. ا ..
انت ضعيف كده ليه .. تماسك يا اخي .. احنا عارفين
بحصل ايه .. مش جاز افرجوا عنه ..

(صوت موتور سيارة ، عبده الفطيرى يسرع
للكافذة ، عبر النافذة ، ياتي لنا ضوء احمر
متقطع .. هو ضوء لبة سيارة البوليس ..
صوب باب سيارة يفلق) ..

عبده : عربية بوليس .

(احمد يجرى ليفتح الباب .. لحظة ويدخل
عصمت مندفا)

عصمت : (يتكلم باندفاع) .. شىء مدهش ان الواحد يتحاكم فى
انجلترا .. قاضى ظريف جدا ولايس باروكة كبيرة بيضة
.. شعرها نازل على كتفه .. سألني .. كنت حاتدى
الشراب لين .. ا .. قلت له ، لامي .. بص لى ببرود ..

وقال لى .. والمحكمة بتحى فيك روح البنية دى ..
وتقديرا من المحكمة لسلوكك قررنا نسفرك مصر فورا
هشان تديهولها بسرعة .. ومن فضلك .. تصوروا ..
يقول لى من فضلك .. من فضلك اوعى تحاول تدخل
انجلترا تانى ... (يلتفت لسعيد) .. الباسبور فين
يا سعيد .. (سعيد يشير لدولاب الحائط .. عصمت
يخرجه منه بسرعة) انجلترا كلها بتتشطر على
وتطردنى .. لكن الظابط اللي جابنى ، جتلمان فعلا ..
طول الكفة واحنا بنتكلم على شكبير .. كان المفروض
يطلعنى على المطار على طول .. استاذنته اجى هنا خمس
دقايق .. اديته كلمة جتلمان .. جاهزة يا امال ..
كوبس انك حضرتى الشنط .

امال : (تمد يدها بمظروف) .. انا سحبت الفلوس من البنك

عصمت : (ياخذ المظروف) .. برافو عليكى .. يالله بينا ..

امال : (من الواضح انه ليس لديها نية السفر) .. عصمت ..
انا عاوزة اقول حاجة ..

عصمت : جيبتي ، احنا قدامنا خمس ساعات فى الطائرة .. نقول
فيهم للصبح .

امال : (بعد ان تلقى نظرة على المجموعة) .. عاوزة اقول لك
حاجة على انفراد ..

سعيد : (بحدثة) .. ممكن تقولى ايه ما ينفعش يتقال قدامنا .
.. اتفضلى اتكلمى .. او اتفضلى اتزلى معاه ..

امال : (بثبات) .. عصمت .. لازم نفكر شوية .. انا حانول
مصر دلوقت اعلم ايه .. حابقى عبء عليك .. انا

حادبك فرصة سنة .. لحد ماتستقر وتكون نفسك ..
وانا حاقعد هنا اشتغل .. ولما تجهز .. تبعت لى اجى
فورا .

(الكل يرقب الموقف باهتمام)

مصمت : (فى حيرة ، يحاول مداراة صدمته) .. آمال .. انا ..
انا .. (يفشل فى ايجاد الكلمة المناسبة .. يكاد
يضحك) .. هه .. آمال .. انا ..

(صوت سرينة بوليس قصيرة جدا ثم جرس
الباب ، احمد يفتح)

احمد : الظابط ..

مصمت : (يرفع صوته) .. Yes Sir Iam Coming

(يذهب لسعيد ، يمد له يده ، يصافحه ،
سعيد يقف ، يحتضنه ، المجموعة كلها
تحتضنها وكانهم جميعا باقة من البشر ،
آمال لا زالت جالسة وحدها منكسة الرأس ،
تجمد اللوحة بينما تخفت الاضاءة .. عندما
يسود الظلام تماما تظل لبة سيارة البوليس
الحمراء تبعث بضوئها المتقطع عبر النافذة ،
تنزل ..)

(الستار)



على سالم

القاهرة ، ٢١ مايو سنة ١٩٧٥

**** سهر الليل ****

www.liilas.com/vb3

رقم الايماغ بنار الكتيب ٢٩٢٥/١٩٧٥